



ПРЕДСТАВНИЧКИ ДОМ


PREDSTAVNIČKI DOM/ZASTUPNIČKI DOM

Комисија за спољне послове

Комисија за ванjsке послове

Broj: 01/2-50-3-2403/25

Sarajevo, 26. 3. 2025.




**KOLEGIJ PREDSTAVNIČKOG DOMA
PARLAMENTARNE SKUPŠTINE BOSNE I HERCEGOVINE**

Perdmet: Izvještaj s javnog saslušanja predsjedavajuće Vijeća ministara BiH i ministra vanjskih poslova BiH u vezi s otkazivanjem organiziranja Samita lidera Zapadnog Balkana koji je trebao biti održan u Neumu 5. 12. 2024.

Poštovani,

Na osnovu člana 40. stav (9) Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20, 53/22, 59/23, 87/23, 50/24 i 73/24), u prilogu vam dostavljam Izvještaj s javnog saslušanja predsjedavajuće Vijeća ministara BiH i ministra vanjskih poslova BiH u vezi s otkazivanjem organiziranja Samita lidera Zapadnog Balkana koji je trebao biti održan u Neumu 5. 12. 2024, koji je Komisija za vanjske poslove Predstavničkog doma Parlamentarne skupštine BiH usvojila na 25. sjednici, održanoj 17. 3. 2025.

S poštovanjem,



Prilog:

- Izvještaj i neautorizirani transkript s javnog saslušanja

Dostaviti:

- naslovu
- a/a



Broj: 01/2-50-3-2403/25

Sarajevo, 17. 3. 2025.

Na osnovu člana 39. stav (1) i člana 40. st. (4) i (9) Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20, 53/22, 87/23, 50/24 i 73/24), Komisija za vanjske poslove Predstavničkog doma Parlamentarne skupštine Bosne i Hercegovine podnosi Predstavničkom domu Parlamentarne skupštine Bosne i Hercegovine sljedeći

IZVJEŠTAJ

s javnog saslušanja Borjane Krišto, predsjedavajuće Vijeća ministara Bosne i Hercegovine, i Elmedina Konakovića, ministra vanjskih poslova Bosne i Hercegovine, u vezi s otkazivanjem Samita lidera Zapadnog Balkana koji je trebao biti održan u Neumu 5. 12. 2024.

I. UVOD

Komisija za vanjske poslove Predstavničkog doma Parlamentarne skupštine Bosne i Hercegovine (u daljnjem tekstu: Komisija) na 22. sjednici, održanoj 3. 12. 2024, na osnovu člana 40. Poslovnika Predstavničkog doma Parlamentarne skupštine BiH razmatrala je i objedinila zahtjev članova Komisije Safeta Keše, Midhata Čauševića i Mladena Bosića za javno saslušanje Borjane Krišto, predsjedavajuće Vijeća ministara BiH, i Elmedina Konakovića, ministra vanjskih poslova BiH, u vezi s otkazivanjem Samita lidera Zapadnog Balkana koji je trebao biti održan u Neumu 5. 12. 2024.

Komisija za vanjske poslove je na 23. sjednici, održanoj 18. 12. 2024, u skladu s članom 40. st.(2) Poslovnika Predstavničkog doma, donijela Odluku o javnom saslušanju Borjane Krišto, predsjedavajuće Vijeća ministara BiH, i Elmedina Konakovića, ministra vanjskih poslova BiH, u vezi s otkazivanjem Samita lidera Zapadnog Balkana koji je trebao biti održan u Neumu 5. 12. 2024. i o tome obavijestila Kolegij Predstavničkog doma Parlamentarne skupštine BiH.

Članovi Komisije za borbu protiv korupcije dopisom od 6. 1. 2025. izrazili su želju za učešće na javnom saslušanju.

U skladu s članom 40. Poslovnika Predstavničkog doma Parlamentarne skupštine BiH, Komisija je provela javno saslušanje ministra vanjskih poslova BiH 21. 1. 2025, s početkom u 12 sati.

II. UČESNICI JAVNOG SASLUŠANJA

Javnom saslušanju prisustvovali su članovi Komisije: Sabina Ćudić, Safet Kešo, Midhat Čaušević, Mladen Bosić, Nihad Omerović i Saša Magazinović.

Članovi Komisije: Darijana Filipović, Obren Petrović i Milan Petković iz opravdanih razloga nisu prisustvovali.

Osim članova Komisije, na javnom saslušanju bili su i članovi Komisije za borbu protiv korupcije Jasmin Emrić i Nermin Mandra, poslanik u Predstavničkom domu Amor Mašović te delegat u Domu naroda Parlamentarne skupštine BiH Ilija Cvitanović.

Pozivu za javno saslušanje odazvao se Elmedin Konaković, ministar vanjskih poslova BiH.

Borjana Krišto, predsjedavajuća Vijeća ministara BiH, dopisom od 21. 1. 2025. opravdala je svoj izostanak.

III. REZIME IZVJEŠTAJA

Javnim saslušanjem predsjedavala je Sabina Ćudić, prva zamjenica predsjedavajuće Komisije za vanjske poslove Predstavničkog doma Parlamentarne skupštine BiH.

Prva zamjenica predsjedavajuće Komisije dala je uvodne napomene o genezi današnjeg saslušanja.

Navela je da je ova komisija 29. 11. 2024. i 2. 12. 2024. zaprimila zahtjeve članova Komisije: Safeta Keše, Midhata Čauševića i Mladena Bosića da se, u skladu s članom 40. Poslovnika Predstavničkog doma Parlamentarne skupštine Bosne i Hercegovine, organizira javno saslušanje predsjedavajuće Vijeća ministara BiH i ministra vanjskih poslova BiH na kojoj bi se članovi Komisije za vanjske poslove upoznali o razlozima otkazivanja Samita lidera Zapadnog Balkana, koji je trebao biti održan u Neumu 5. 12. 2024. godine.

Komisija za vanjske poslove Predstavničkog doma je na 22. sjednici, održanoj 3. 12. 2024, razmatrala i većinom glasova usvojila zahtjev za javno saslušanje.

Na 23. sjednici, održanoj 18. 12. 2024, Komisija je donijela Odluku o provođenju saslušanja i o tome obavijestila Kolegij Predstavničkog doma Parlamentarne skupštine BiH.

Napomenula je da zbog velikog broja učesnika i radi efikasnijeg i produktivnijeg rada članovi Komisije za vanjske poslove i članovi Komisije za borbu protiv korupcije Predstavničkog doma Parlamentarne skupštine BiH zaključke mogu dostaviti pisanim putem, da će Komisija na jednoj od narednih sjednica razmatrati pristigle zaključke i izjasniti se o njima kao sastavnom dijelu Izvještaja te na osnovu člana 40. stav (9) Poslovnika Predstavničkog doma Parlamentarne skupštine BiH Izvještaj sa saslušanja prosljediti Predstavničkom domu Parlamentarne skupštine BiH u daljnjju parlamentarnu proceduru.

Nakon uvodnih napomena, prva zamjenica predsjedavajuće dala je riječ podnosiocima zahtjeva za javno saslušanje.

Članovi Komisije za vanjske poslove: Safet Kešo, Midhat Čaušević i Mladen Bosiću u svom uvodnom obraćanju kazali su da je ovo jedna od najvećih blamaža u organizaciji međunarodnih skupova i da ovaj događaj na međunarodnom planu srozava ugled naše zemlje do nedopustivog nivoa, smatrajući najodgovornije osobe za tu blamažu Borjanu Krišto, predsjedavajuću Vijeća ministara BiH, i Elmedina Konakovića, ministra vanjskih poslova BiH.

U daljnjem izlaganju podnosioci su istaknuli da se ne može dopustiti da ovaj slučaj prođe bez posebnog osvrta i analize uzorka, posljedica i odgovornosti onih koji su bili dužni preduzeti sve da se ovakva blamaža pred očima regionalne i svjetske javnosti ne dogodi.

Tokom uvodnog izlaganja istaknuto je da ovakav akt ostavlja negativne posljedice na status Bosne i Hercegovine u međunarodnoj zajednici.

Elmedin Konaković, ministar vanjskih poslova BiH, u svom obraćanju kazao je da Ministarstvo vanjskih poslova BiH nije bilo organizator Samita, da postoji razlika između Samita lidera Zapadnog Balkana i Berlinskog procesa. Istaknuo je da je za organiziranje Samita saznao iz medija, saglasan je da je ovo jedna velika blamaža za Bosnu i Hercegovinu na međunarodnom planu, ali da on nije prisustvovao sjednicama Vijeća ministara BiH kada je donesena odluka o zakazivanju i otkazivanju navedenog samita, te da ne snosi bilo kakvu odgovornost.

Prva zamjenica predsjedavajuće Komisije otvorila je raspravu.

Pitanja su postavljali članovi Komisije: Safet Kešo, Midhat Čaušević, Mladen Bosić, Nihad Omerović i Sabina Ćudić.

Osim članova Komisije, pitanja su postavljali i članovi Komisije za borbu protiv korupcije Jasmin Emrić i Zlatan Begić.

Odgovore na postavljena pitanja dao je Elmedin Konaković, ministar vanjskih poslova BiH.

Na pitanje kada je Bosna i Hercegovina, a kada Vijeće ministara BiH saznalo da mi trebamo biti domaćin i organizator Samita lidera Zapadnog Balkana i predstavnika Evropske unije u Bosni i Hercegovini, ministar je kazao da je na 61. sjednici Vijeća ministara BiH koja je održana 17. 10. 2024. donesena Odluka o formiranju Tima za pripremu i organizaciju Samita lidera Zapadnog Balkana i Evropske unije u Bosni i Hercegovini, pozivajući se na dopis predsjedavajuće Vijeća ministara od 21. 1. 2025. kazao je da je Borjana Krišto, predsjedavajuća Vijeća ministara BiH, tek u oktobru 2024. od institucija Evropske unije dobila konačnu i službenu potvrdu o održavanju Samita lidera Zapadnog Balkana u našoj zemlji.

Nadalje, postavljeno je pitanje da li su Ministarstvo vanjskih poslova BiH Odlukom Vijeća ministara BiH i ministar lično bili zaduženi i imali dodirnih tačaka s organiziranjem Samita i da li se u skladu s njegovim javno iskazanim stavom smatra u bilo kojoj mjeri odgovoran za propast ovog izuzetno važnog skupa međunarodnog karaktera i za blamažu države Bosne i Hercegovine na međunarodnom planu. Odgovorio je da je za organiziranje Samita saznao iz medija, jer je u to vrijeme bio na službenom putovanju, da je Odluka donesena na sjednici Vijeća ministara BiH 17. 10. 2024, gdje je i formiran Tim za organiziranje Samita i u toj su odluci jasno precizirane sve nadležnosti. Naveo je da Vijeće ministara BiH ima svoj tim koji

je trebao organizirati Samit, a da bi Ministarstvo vanjskih poslova BiH dalo oficire za vezu kao neku vrstu posrednika, za potrebe dobre komunikacije i slanja dokumenata i da Ministarstvo, osim u manjem dijelu tehničkog i protokolarnog, nema nadležnosti i odgovornosti za organiziranje navedenog samita.

Postavljeno je i pitanje ko je i kada odlučio da će organizacija tog samita biti realizirana putem javnog poziva odnosno tendera. Ministar Konaković naveo je da niko iz Ministarstva vanjskih poslova BiH nije učestvovao u dijelu javnih nabavki, da mu nije bio poznat postupak i da u organizacionom odboru koji je imao svega dva sastanka nisu donijeli odluku o provođenju postupka za javnu nabavku. Također je kazao da je u odgovoru koji je dobio od Sekretarijata Vijeća ministara BiH jasno navedeno da je Sekretarijat Vijeća ministara BiH proveo proceduru javne nabavke u kojoj su učestvovali državni službenici koji se u Sekretarijatu bave svojim poslom dugi niz godina.

Elmedinu Konakoviću, ministru vanjskih poslova BiH, postavljena su i određena pitanja u vezi s Privrednim društvom „Min Set“ d.o.o. Ministar Konaković kazao je da nema dodirnih tačaka sa izborom firme koja je trebala organizirati Samit u Neumu 4. i 5. 12. 2024. Ponovio je da zna čovjeka i njegovu kćerku i da je iz medija saznao da je prvorangirana firma na tenderu „Min Set“ u vlasništvu čovjeka koji je njemu blizak i da su on i njegova kćerka direktori navedene firme. Elmedin Konaković u daljnjem odgovoru na ovo pitanje pozdravio je odluku Ureda za razmatranje žalbi, koji je ustanovio da navedena firma nema odgovarajuću dokumentaciju, te poziva pravosuđe i tužilaštvo da do kraja ispituju ovaj slučaj i da će vrlo rado u pisanoj formi dostaviti sve potrebne informacije.

Ministru Konakoviću postavljeno je i pitanje ko je odgovoran za ovu sramotu i propast Samita, odgovorio je da najveću odgovornost za otkazivanje snosi predsjedavajuća Vijeća ministara BiH koja je od institucija Evropske unije dobila konačnu i službenu potvrdu o održavanju Samita lidera Zapadnog Balkana u našoj zemlji te, istina u veoma kratkom roku, smislila način kako da to implementira i taj zadatak povjerila Sekretarijatu Vijeća ministara BiH.

Na pitanje da li je ministar bio na odmoru ili radno angažiran kada je donesena Odluka o održavanju Samita, odnosno organizaciji Samita u Neumu 4. i 5. 12. 2024, još jednom je kazao da nije bio na godišnjem odmoru, nego da je bio na službenom putovanju, sastanku OSCE-a, na samitu sličnog formata koji je jedan od prioriteta za Bosnu i Hercegovinu.

Dio pitanja odnosio se i na to koje će aktivnosti biti preduzete prema onima koji su provodili proces javne nabavke, od onih koji su ih imenovali, uključujući sankcije prema bilo kome. Ministar Konaković kazao je da treba pokrenuti aktivnosti prema odgovornim osobama podnijeti prijavu i da pozdravlja istragu koju će otvoriti Tužilaštvo BiH po ovom pitanju.

Postavljeno je i pitanje ko je izdao falsificirane isprave, da li je firma „Min Set“ izdala te isprave, podmetnula ili su u pitanju drugi javno-pravni subjekti. U svom odgovoru Elmedin Konaković, ministar vanjskih poslova BiH, ponovio je da je spreman supotpisati kaznenu prijavu i da se ustanovi da li je i ko je falsificirao dokumente i dodijelio organiziranje Samita navedenoj firmi.

Tokom rasprave istaknuto je da je Ministarstvo vanjskih poslova BiH moralo biti uključeno, ako ništa, onda kao promotor ugleda Bosne i Hercegovine. Vijeće ministara BiH kao organizator Samita na ovaj je način poslalo sliku o svojoj nesposobnosti da organizira jednu

uobičajenu aktivnost i da je neophodno da ova komisija kao i šira javnost dobiju odgovore na jednom mjestu o stvarnim činjenicama u vezi s ovim događajima.

Na kraju javnog saslušanja prva zamjenica predsjedavajuće Komisije podsjetila je prisutne da mogu eventualna pitanja i prijedloge zaključaka dostaviti pisanim putem i da će Komisija na jednoj od narednih sjednica razmatrati pristigle zaključke, izjasniti se o njima kao sastavnom dijelu Izvještaja i u skladu s članom 40. stav (9) Poslovnika proslijediti Predstavničkom domu Parlamentarne skupštine BiH u daljnju parlamentarnu proceduru.


IV. ZAKLJUČCI KOMISIJE

Komisija za vanjske poslove Predstavničkog doma Parlamentarne skupštine BiH je na 25. sjednici, održanoj 17. 3. 2025, usvojila Izvještaj s javnog saslušanja Borjane Krišto, predsjedavajuće Vijeća ministara Bosne i Hercegovine, i Elmedina Konakovića, ministra vanjskih poslova Bosne i Hercegovine, u vezi s otkazivanjem Samita lidera Zapadnog Balkana koji je trebao biti održan u Neumu 5. 12. 2024.

Nakon rasprave, Komisija za vanjske poslove jednoglasno je usvojila sljedeće zaključke koje upućuje Predstavničkom domu na usvajanje:

1. Komisija smatra da je neprihvatljivo neblagovremeno obavještenje Borjane Krišto, predsjedavajuće Vijeća ministara BiH, o nemogućnosti učestvovanja u javnom saslušanju.
2. Komisija podržava istragu Tužilaštva BiH u vezi s otkazivanjem Samita lidera Zapadnog Balkana koji je trebao biti održan u Neumu 5. 12. 2024. te zadužuje stručne službe da dokumente, materijale ove komisije, nakon njihovog današnjeg usvajanja, dostave Tužilaštvu BiH, a od Tužilaštva BiH traži da obavijesti Komisiju o okončanju istrage.

U skladu s članom 122. Poslovnika Predstavničkog doma Parlamentarne skupštine BiH, Komisija je za izvjestioca na sjednici Predstavničkog doma Parlamentarne skupštine BiH odredila prvu zamjenicu predsjedavajuće Komisije Sabinu Ćudić.



Prilog:

- neautorizirani transkript javnog saslušanja

Dostaviti:

- naslovu
- a/a

NEAUTORIZIRANI TRANSKRIPT
JAVNOG SASLUŠANJA MINISTRA VANJSKIH POSLOVA BIH, ELMEDINA
KONAKOVIĆA U VEZI OTKAZIVANJA ORGANIZOVANJA SAMITA LIDERA
ZAPADNOG BALKANA, KOJI JE TREBAO BITI ODRŽAN U NEUMU 05.
DECEMBRA 2024. GODINE – U ORGANIZACIJI KOMISIJE ZA SPOLJNE POSLOVE
održanog 21.01.2025. godine

PRVA ZAMJENICA PREDSEDavajuĆE,
SABINA ĆUDIĆ

Sa kašnjenjem od pet minuta i ispričama za to, želim vam svima poželjeti srdačnu dobrodošlicu. Prije svega, naravno, i medijima koji su tu, pridružili su nam se na ovom javnom saslušanju, ali poželjeti toplu dobrodošlicu ministru Konakoviću i kolegama iz Povjerenstva za vanjske poslove i Komisije za borbu protiv korupcije koji su naši današnji gosti i objasniti ću njihovu ulogu ovdje danas.

Dužna sam napomenuti da predsjedateljica ove Komisije, Darijana Filipović nije u prilici danas biti sa nama, pa kao prva zamjenica, odnosno dopredsjedavajuća u ovoj Komisiju, vodit ću ovu sjednicu.

Na početku ću dati nekoliko uvodnih napomena. Dakle, ovo javno saslušanje prvobitno je bilo zakazano za 16. januar 2025. godine. Razlog održavanja, odnosno razlog neodržavanja ovog saslušanja u tom datumu i terminu veže se za činjenicu da je taj dan zakazana hitna sjednica Zastupničkog doma Parlamentarne skupštine BiH.

Pored toga, reći ću nekoliko napomena o genezi, genezi ovog saslušanja. Članovi Povjerenstva, dakle, kojim ja danas predsjedavam, Safet Kešo i Midhat Čaušević 29.11.2024. godine na osnovu člana 40. Poslovnika Zastupničkog doma, podnijeli su zahtjev za javnim saslušanjem Borjane Krišto kao predsjedateljice Vijeća ministara BiH i Elmedina Konakovića, ministra vanjskih poslova BiH, a u vezi sa otkazivanjem organiziranja Samita lidera Zapadnog Balkana koji se trebao održati u Neumu 04. i 05. decembra 2024. godine.

02.12.2024. godine zahtjev za javnim saslušanjem podnio je i član Povjerenstva Mladen Bosić, a naša Komisija za vanjske poslove je na svojoj 22. sjednici održanoj 03.12.2024. godine objedinila i razmatrala zahtjev za javnim saslušanjem, većinom glasova usvojila navedeni zahtjev. Na ovoj sjednici održanoj 18., na svojoj 23. sjednici održanoj 18.12.2024. godine, Komisija je na temelju člana 40. stava (2) donijela Odluku o provođenju javnog saslušanja.

Povjerenstvo za borbu protiv korupcije dostavilo je dopis 06.01.2025. godine da žele učestvovati u radu današnjeg saslušanja. Na osnovu člana 7. stav (3) Poslovnika Zastupničkog doma, zastupnici mogu učestvovati u radu ove Komisije čiji nisu član, osim u radu Povjerenstva za pripremu izbora Vijeća ministara BiH i Zajedničkog povjerenstva za nadzor nad radom Obavještajno-sigurnosne agencije BiH bez prava glasa. Dana 14.01. Povjerenstvo za vanjske poslove zaprimilo je dokumentaciju – žalbu dakle, na tender za organizovanje Samita lidera Zapadnog Balkana koji smo proslijedili članovima ove Komisije.

Prije nego što dam, dakle, uvodne riječi podnositeljima zahtjeva i ministru vanjskih poslova, predložiti ću, dakle, sljedeći sistem rada za danas kako bismo bili efikasni i učinkoviti. Dakle, predlažem da nakon uvodnih napomena od čega ću se ja samo osvrnuti na odsustvo pozvane predsjedateljice Vijeća ministara, Borjane Krišto, a nakon čega ću dati riječ dakle, podnositeljima zahtjeva i ministru vanjskih poslova, predložila bih da diskusiju organizujemo na sljedeći način. Nakon uvodnih napomena i uvodnih riječi, ponavljam, od podnosioca zahtjeva i samog ministra, dakle, učesnici koji se javljaju za diskusiju će imati do 10 minuta da postave pitanje, dobiju eventualne odgovore i ostvare diskusiju. Nakon tog prvog kruga, u skladu sa vremenom, nadam se da možemo zaključiti Komisiju za dva sata od njenog početka. Imat ćemo priliku i za finalne napomene, riječi, po naravno javljanju samih članova obje Komisije.

Također ću vas napomenuti da zbog velikog broja učesnika današnje rasprave imat ćemo mogućnost da zaključke, prijedloge zaključaka sa ove Komisije podnesemo pismenim putem i jedna i druga Komisija, o čemu će se ova Komisija za vanjske poslove očitovati, usvajati ili ne usvajati, naravno, na jednoj od narednih, odnosno narednoj sjednici ove Komisije i u sklopu sa izvještajem sa ove Komisije i tonskim zapisom, proslijediti to Parlamentarnoj skupštini, odnosno Predstavničkom domu Parlamentarne skupštine BiH.

Bila sam slobodna da se konsultujem sa kolegama članovima Komisije u pripremi kako bismo osigurali, je li, podršku za ovu metodologiju rada danas.

Pored zakona, pravilnika i Poslovnika koji sam citirala u uvodnim napomenama koji su osnov za današnje javno saslušanje, ja ću u kontekstu činjenice da nam je jedan od ključnih sudionika, odnosno prva osoba koju smo pozvali u listi osoba koje smo pozvali na ovo javno saslušanje, predsjedavajuća Borjana Krišto, se nije pojavila na današnjem saslušanju, napomenut ću dvije stvari. Prvo ću napomenuti, odnosno citirati Zakon o parlamentarnom nadzoru BiH, njegov član 11. koji kaže: Tijelo koje provodi parlamentarni nadzor može pozivati i saslušati svjedoke iz bilo koje institucije u BiH i može od njih zahtijevati da odgovore na sva pitanja, iznesu sve činjenice i informacije kao i one koje se smatraju tajnim podatkom. Stav (2) – Na poziv tijela koje provodi parlamentarni nadzor svako lice iz nadzirane institucije dužno je odazvati se pozivu i prisustvovati sjednicama tijela koje predvodi parlamentarni nadzor i u okviru svojih ovlaštenja dati informacije, odgovarati na pitanja članova tijela koje provodi parlamentarni nadzor. Stav (3)

U okviru svojih ovlaštenja pozvano lice dužno je govoriti istinu, priložiti traženu dokumentaciju, dati informacije, odgovarati na pitanja članova tijela koje provodi parlamentarni nadzor. I ključno, Član 4. – U slučaju, odnosno stav (4) – U slučaju spriječenosti pozvano lice obavezno je pismenim putem obavijestiti tijelo koje provodi parlamentarni nadzor o razlozima spriječenosti najkasnije 48 sati prije početka sjednice.

Pa u skladu s tim, ja ću vas napomenuti da, kako je zabilježeno u protokolu ovog Doma, zaprimili smo pismenu informaciju da predsjedavajuća Borjana Krišto neće prisustvovati ovom javnom saslušanju. Zaprimljena je informacija koju ste dobili, koju ćete dobiti ili ste već dobili pismenim putem 21.01., što je tačnije danas u 10,45 što znači da nisu ispoštovani rokovi za informisanje ove Komisije o neprisustvovanju samoj Komisiji.

Toliko od mene u ovim uvodnim napomenama. Naravno i sama ću učestvovati u diskusiji, ali prije svega dajem riječ podnositeljima zahtjeva i s obzirom da je zahtjev objedinjen,

pretpostavljam da će jedan član Komisije govoriti u ime podnosioca zahtjeva za održavanjem ovog javnog saslušanja. Da li ste to Vi, kolega Kešo ili?

_____(?)
/nije uključen mikrofon/

SABINA ĆUDIĆ
Ili kolega Bosić, evo.

_____(?)
/nije uključen mikrofon/
Govorit ćemo svi.

SABINA ĆUDIĆ
Govorit će, ne govorim o diskusiji, govorim uvodne napomene o zahtjevu. Kome.

_____(?)
/nije uključen mikrofon/
Jedan za uvodne napomene.

SAFET KEŠO
Pa evo može, može, nije problem.

SABINA ĆUDIĆ
Kolega Kešo, izvolite.

SAFET KEŠO

Zahvaljujem, uvažena predsjedavajuća. Dobar dan želim svima, pozdravljam sve kolegice i kolege iz dvije Komisije. Sticajem okolnosti ja sam član i Komisije za vanjske poslove i Komisije za borbu protiv korupcije. Pozdravljam također i prisutne predstavnike medija, a pošto će gledati i građani, dakle i građane.

U skladu sa članovima 39. i 40. Poslovnika Predstavničkog doma Parlamentarne skupštine BiH, ja, kolega Čaušević, kasnije vidim i kolega Bosić, iskoristili smo priliku, odnosno institut javnog saslušanja i smatramo da ga inače treba vratiti u život i moram kazati da ljubim ruke onima koji su glasali za uvođenje instituta javnog saslušanja, budući da se stavovi, različiti stavovi najodgovornijih rukovodnih lica najčešće tumače ili na Facebook stranicama ili u medijima, a da se zapravo izbjegava ova adresa. Ovo je jedinstvena prilika da evo i mi čujemo odgovore na pitanja koja nas zanimaju i naravno da se i javnost upozna sa, ovaj, sa obje strane medalje.

Vi ste, predsjedavajuća, dobro primjetili da je ovo izvinjenje ili otkazivanje prisutnosti ovom javnom saslušanju uvažene predsjedavajuće Krišto podneseno ili dostavljeno neblagovremeno i u skladu sa članom 39. Poslovnika koji u tački a), odnosno u tački c) kaže da Komisija može pokrenuti pitanje odgovornosti za neodazivanje pozivu Komisije, davanje lažnih ili netačnih izjava Komisiji pod zakletvom i tako dalje.

Zašto smo smatrali da treba obaviti javno saslušanje? Bili smo svi šokirani činjenicom i vijeću da je došlo do propasti ovog Samita lidera Zapadnog Balkana i Evropske unije, ovaj, u BiH i smatrali smo to najvećom mogućom blamažom države BiH u poslijeratnom periodu, barem u ovoj oblasti organizacije međunarodnih skupova. Nije mala stvar, je li, pozvati toliki broj ljudi, sve lidere regije Zapadnog Balkana, tolike međunarodne predstavnike, prema informacijama do kojih se moglo doći, što najodgovornijih, što članova kojekakvih delegacija i tako dalje, ovdje je trebalo biti prisutno preko stotinu, stotinu pedeset, stotinu šezdeset čak, ovaj, predstavnika. I sad imate situaciju da mi koji smo domaćini, znate mi nismo pozvani na prisustvujemo na neki samit pa da smo otkazali, ovaj, svoje prisustvo, to bi bio jedan grijeh sa jednom težinom, ali biti domaćin jednog takvog skupa pa ga otkazati pet do dvanaest, znajući da su mnogi od lidera Zapadnog Balkana i onih faktora Međunarodne zajednice koji su trebali biti na njemu, da su oni prije toga i organizirali i reorganizirali, ovaj, svoje rokovnike, svoje planere i tako dalje, da bi se prilagodili tom našem skupu. Dakle, pokazali su naravno interesovanje i poštovanje prema nama. Mi sami to nismo.

To je bila, dakle, potreba da ta činjenica, ta najveća moguća blamaža države na međunarodnom planu dobije ovaj format, da građani dobiju odgovore na pitanja koja ćemo postaviti onima za koje smo mi ocijenili, mi kao podnosioci, ovaj, ovog zahtjeva za javno saslušanje da su najodgovornije osobe u cijeloj ovoj priči. To su predsjedavajuća Vijeća ministara i to je ministar vanjskih poslova, gospodin Konaković koga pozdravljam i evo zahvaljujem se što je danas prisutan ovdje. Ne bih se naravno mogao zahvaliti na, ovaj, njegovim robusnim nastupima u medijima i na činjenici da on poručuje svima nama kako će on nas naučiti šta su čije nadležnosti i tako dalje. To je sad posebna tema i ne bih da možda i počinjemo na taj način, ali svakako, ovaj, sa indignacijom odbijam, dakle, odbacujem sve te pokušaje da se ljudi, ovdje ima redovnih profesora Univerziteta, ovdje ima ljudi sa po 10, 20 godina parlamentarnog iskustva i poručivati im da ne znaju za plaću od 6.000,00 KM a u zagradi da stavimo da ministar ima još veću plaću i da ima 10, 20 ili 30 hiljada KM mjesečno na raspolaganju za svoje troškove, da on nama poručuje kako mi ne znamo raditi svoj posao, da ne znamo šta su nadležnosti ni naše, ni Samita i tako dalje, a zapravo, je li, činjenicom i svojim porukama da on smatra da Ministarstvo vanjskih poslova nije imalo nikakvih dodirnih tačaka sa organizacijom Samita i da ih nije trebalo imati, time praktično pokazuje da on ne zna svoj posao, je li.

Mi smo željeli ovdje dobiti odgovore na pitanja, dakle, koja su na jednom mjestu. Kad je BiH, kad je Vijeće ministara saznalo da mi trebamo biti domaćini i organizatori Samita, ovaj, lidera Zapadnog Balkana i predstavnika Evropske unije u BiH? Dakle, kad? Podsjećam da je prethodni Samit sredinom maja mjeseca prošle godine održan u Crnoj Gori i podsjećam da ga je organiziralo upravo Ministarstvo vanjskih poslova, što znači da tamo gdje je uspješna organizacija, odnosno da je uspješna organizacija tamo gdje ljudi koji su nadležni za ovu vrstu međunarodnih skupova, dakle, skupova tog karaktera, da se onda tamo ti skupovi, ovaj i organiziraju i provedu na kvalitetan i uspješan način. Tamo gdje oni čija je ovo primarna nadležnost smatraju da nemaju nikakvih dodirnih tačaka s tim, tamo se događaju blamaže ove vrste, otkazivanje ovako jednog važnog međunarodnog skupa, znate.

I eto, htjeli smo ovdje dobiti odgovore na sva ta pitanja, željeli smo da nam neko poreda datume, bila je naravno pozvanija predsjedavajuća Vijeća ministara da odgovori na neka konkretna pitanja, kad su donijeli odluku, prvu odluku o, koje su zapravo prve aktivnosti bile, je li, Vijeća ministara. Kad je imenovan tim za pripremu i organizaciju Samita? Ko je i kada odlučio da će

organizacija tog Samita biti realizirana putem javnog poziva odnosno putem tendera? Zašto je to neko tako odlučio kad znamo da imamo protokole i Predsjedništva i Vijeća ministara i da imamo i odjeljenje unutar Ministarstva vanjskih poslova za diplomatski protokol i tako dalje i tako dalje. Sve su to, dakle, pitanja koja traže odgovore i mi ćemo ovdje također zatražiti odgovore na pitanja da li je ovaj tim, ko ga je imenovao, po kojim kriterijima, zašto je tamo, recimo, od ukupno 13 čini mi se, članova tog tima, zašto je pet savjetnika, odnosno pet šefova kabineta, jer oni nisu državni službenici? Zašto su državni službenici, ovaj, stavljeni van ove priče? Zašto ih se minimizira, zašto ljudi koji su direktno odgovorni, zapravo, po Zakonu o državnoj službi, zašto se oni stavljaju u neki drugi plan, a ovamo se, dakle, lica koja su imenovana, koja su direktno vezana, dakle, i za mandate samo određenih ministara, zašto su ovdje, ovaj, u prvom planu, zašto su i šta su poduzeli, jesu li podnijeli izvještaj o svom radu Vijeću ministara? Je li Vijeće ministara predlagalo i donijelo ikakve mjere, je li odredilo sankcije prema bilo kome? Je li pronašlo ko je krivac za propast Samita i tako dalje. Ako nije Vijeće ministara pronašlo pod navodnicima „krivca“ i ako nije poduzimalo nikakve mjere u smislu izricanja sankcija, onda mislim da će evo dvije Komisije koje danas ovdje vrše, obavljaju ovo javno saslušanje sigurno na svojim sjednicama koje ćemo održati naknadno, predložiti neke mjere, je li, ovaj i pretpostavljam predložiti u okviru toga i neke sankcije.

Toliko za ovaj uvodni dio.

SABINA ĆUDIĆ

Hvala, kolega Kešo.

Da li se ostale kolege predlagatelji žele sada očitovati? Izvolite, kolega Čaušević.

MIDHAT ČAUŠEVIĆ

Dobar dan svima. Želim vas sve pozdraviti.

_____(?)
/nije uključen mikrofoni/

MIDHAT ČAUŠEVIĆ

Dobar dan svima. Želim vas sve pozdraviti i zaista cijenim što ste, prije svega, mediji i ostali prisutni izdvojili svoje vrijeme i došli da prpratite ovo danas zakazano javno saslušanje.

Ja ću pokušati biti konkretniji u odnosu na uvodno izlaganje i cijenim da su ovo opravdani razlozi zbog čega je danas sazvano ovo javno saslušanje. Radi javnosti, radi građana, želim istaći sljedeće. Odgađanje Samita lidera Zapadnog Balkana je jedna od najvećih blamaža države BiH od Dejtona do danas, a odgođen je zbog lažiranja dva papira od firme koja nije očito ispunjavala uslove. Javnost treba da zna da je firma kao prvorangirana koja je dobila posao za organizaciju samog Samita, kako to imamo i u rješenju Ureda za razmatranje žalbi BiH, dostavila dva dokumenta koja su, između ostalog, dokazano da su nedostatna, odnosno evo prema samom žalitelju i lažirana. Firma koja je dobila posao je registrovana 19.06.2024. godine, a dokumente o ispunjavanju uslova kako bi uopšte mogla biti dio ovog procesa, odnosno procesa javne nabavke je dostavila od 01.05.2024. i od 03.05.2024. Dokumenti koji pokazuju, odnosno potvrde koji pokazuju da ta firma uopšte nije bila registrovana u momentu izdavanja potvrda kao uslov za samo prijavljivanje na ovu javnu nabavku.

Ako krenemo dalje po samoj hronologiji svih učesnika u ovom procesu, pa i učesnika firme koja je uputila žalbu Uredu za žalbe i u odgovoru nadležnih na kompletnu proceduru, dolazimo do novih saznanja da se tim za samu organizaciju Samita, između ostalog, ograduje kako oni zbog same brzine, odnosno ozbiljnosti procesa, nedostatka kadrova nisu mogli ulaziti u sve pojedinačne osobine samih dokumenata, te da je, evo stoga, i moguće da postoje određene greške.

Prvo pitanje – da li je iko...

(?)

/nije uključen mikrofoni/

To pitanje da li zapisujem ili nakon ovog obraćanja...

(?)

/nije uključen mikrofoni/

Dakle, ovo su uvodne napomene podnosioca zahtjeva, ali ja Vas pozivam da ukoliko sada krećete sa pitanjima da to ulazi u ovo vrijeme predviđeno zato što...

(?)

/nije uključen mikrofoni/

Možemo kasnije...

MIDHAT ČAUŠEVIĆ

Ma vidite, ako možemo biti efikasniji u sklopu ovoga ja ću i postaviti pitanja pa slobodno možete zapisati, ovaj, ako cijenite da Vi trebate na njih odgovoriti. Ako ne cijenite, ova pitanja će ostati u javnom prostoru, odnosno tražit ćemo pismeni odgovor od nadležnih.

Prvo pitanje – da li je poduzeta bilo kakva aktivnost prema onim koji su sprovodili proces javne nabavke od strane onih koji su ih imenovali u dijelu, evo da je utvrđeno da je napravljen propust. Nemamo ovdje danas predsjedavajuću Vijeće ministara, a značajno bi nam bilo da smo dobili odgovor šta je se to čekalo sve do 17.10.2024. godine da se na sjednici Vijeća ministara formira tim za organizaciju samog Samita. Ako imamo njenu izjavu po završetku Samita u Crnoj Gori polovinom maja, da će naredni samit biti organizovan, da će domaćin biti BiH i to u septembru, a ne u 11. mjesecu kako je to sada. Od formiranja tima do raspisivanja javnog poziva od 17.10. do 08.11. prošao je gotovo mjesec dana, a datum je 05.12. Da li je se svjesno činilo sve da se ovaj proces dovede u fazu nedovoljnog vremena i da se pod tom krinkom dođe u situaciju da imamo izbor onog ko je, evo, izabran, nedostatan, koji ne ispunjava uslove, a da opet pod značajem samog ovog događaja skratimo tu mogućnost upućivanja žalbi, odnosno svega onoga što može prouzrokovati odgađanje samog Samita.

Treba ovdje još naglasiti i sljedeće i volio bih da mi ministar Konaković odgovori na pitanje – da li i dalje stojite na stanovištu da Vi kao ministar vanjskih poslova BiH niste imali niti ste trebali imati bilo kakvih dodirnih tačaka sa organizacijom propalog Samita lidera Zapadnog Balkana u Neumu i da li se u skladu sa tim Vašim javno iskazanim stavom smatrate u bilo kojoj

mjeri odgovornim za propast ovog izuzetno važnog skupa međunarodnog karaktera i za blamažu države BiH na međunarodnom planu?

SABINA ĆUDIĆ

Ja ću Vas napomenuti na vrijeme da imate još jednu minutu.

MIDHAT ČAUŠEVIĆ

Evo završavam.

Cijeneći kompletnu ovu situaciju, volio bih radi javnosti i radi svega onoga što smo mogli čuti u javnom prostoru, nema predsjedavajuće Vijeća ministara, ali evo njoj bih postavio drugu vrstu pitanja, ali postaviti ću ministru Konakoviću. Kako smo mogli pročitati u tekstu od, po samom otkazivanju Samita iz medija, čini mi se da je u pitanju Radio Slobodna Bosna, tamo se tačno navodi da je firma koja je dobila, odnosno koja je bila kao najbolja izabrani, najbolji ponuđač, a poslije se ispostavilo da ne ispunjava uslove, firma od Vašeg kuma, ministre, odnosno kćerke Vašeg kuma i između ostalog, i taj momenat se dovodi u vezu lično sa Vama u dijelu dodjeljivanja tog posla pomenutoj firmi, evo koja nije ispunjavala uslove.

Završit ću, ako do sad nije postojala nikakva odgovornost svih onih koji su nas doveli u ovu situaciju, prije svega mislim od onih koji su trebali da budu na čelu samog ovog procesa pa do onih koji su sprovodili tu proceduru, da zaista BiH je doživjela jedan veliki međunarodni šamar, evo bez bilo kakvog segmenta odgovornosti.

Hvala.

SABINA ĆUDIĆ

Hvala, kolega Čaušević.

S obzirom da smo, čini mi se, imali samo dva konkretna pitanja za ministra Konakovića, ja predlažem, ako se ministar slaže da damo riječ i kolegi Bosiću, kao predlagачu i da onda objedinite barem na ove prve uvodne napomene i pitanja predlagачa Vaše odgovore.

ELMEDIN KONAKOVIĆ

Prije svega, pozdravljam cijenjeni skup, medije posebno.

Reći ću svoje mišljenje o ovom formatu. Rekli ste da imam prvo uvodno obraćanje ja, dajte mi uvodno obraćanje koje imam, a onda ću vrlo rado odgovarati na pitanja.

SABINA ĆUDIĆ

Izvolite, svakako.

_____(?)
/nije uključen mikrofoni/

ELMEDIN KONAKOVIĆ

/nije uključen mikrofoni/

Poslije Vas, Vi ste, kad dođe moj red.

SABINA ĆUDIĆ

S obzirom, napominjem, da su zaprimljena tri zahtjeva za održavanjem koja su našoj sjednici objedinjena, ne radi se o tri različita zahtjeva. Zato sam na početku predlagala da se ispred tog zahtjeva obrati kolega Kešo, pa sam dala, dakle, uprkos tome, riječ i kolegi koji je također se pridružio tom zahtjevu. Zato predlažem ukoliko kolega Bosić misli da je ispred predlagача pokrivena ova tematika, da damo priliku ministru za uvodne napomene, a onda se kolega Bosić i svi mi ostali članovi obje Komisije možemo prema predviđenom formatu postavljati pitanja i diskutovati sa prisutnim ministrom.

_____(?)
/nije uključen mikrofon/

_____(?)

Znači, ja nemam ništa protiv da ministar Konaković kaže svoju uvodnu riječ, čak me zanima šta će biti, od toga će i zavisiti moje pitanje. Znači...

SABINA ĆUDIĆ

Dobro.

_____(?)
Ja ću ostaviti svoju diskusiju za...

SABINA ĆUDIĆ

Vi imate pravo na diskusiju u svakom slučaju.

_____(?)
Tako je.

SABINA ĆUDIĆ

Hvala.

Izvolite, ministre Konakoviću.

ELMEDIN KONAKOVIĆ

Zahvaljujem, predsjedavajuća.

Pozdravljam Vas, pozdravljam cijenjene članove Komisije, medije posebno. Jako mi je drago da vlada ovako velika zainteresiranost za jednom ovako važnom temom i slažem se s gospodinom Kešom. Mislim da u ovom parlamentarnom životu ove vrste javnih saslušanja zaista trebaju biti praksa kako bismo gledajući se licem u lice mi danas a i neki drugi akteri često pred ovim ljudima koji su sud javnosti iznijeli fakte, činjenice a ne onako kako ste to u politici uglavnom radi, saopštenjima iz nekih političkih zakona bombardovali našu javnost.

Pozdravljam format uvijek ću se i vrlo rado odazvati na svako javno saslušanje koje se tiče mog posla ili teme za koju vi mislite da sam odgovoran.

A u startu ću odmah reći da, gospodine Kešo, mislio sam možda da čak ima i neke zlonamjernosti, ne vidim je ovdje, ne znate ni kako se dešavaju samiti u okviru Zapadnog Balkana, ni šta je Berlinski...

ELMEDIN KONAKOVIĆ

/nije uključen mikrofoni/

Šta je Zapadni Balkan...

(?)

/nije uključen mikrofoni/

ELMEDIN KONAKOVIĆ

/nije uključen mikrofoni/

Ugasio me Kešo.

(?)

/nije uključen mikrofoni/

ELMEDIN KONAKOVIĆ

/nije uključen mikrofoni/

Pritisnuo je...

SAFET KEŠO

Mogu li samo poslovnički, izvinjavam se.

ELMEDIN KONAKOVIĆ

/nije uključen mikrofoni/

... prekida Kešo ili imam ja neko svoje vrijeme?

SABINA ĆUDIĆ

Ne daju, imamo uvodno obraćanje, oprostite molim Vas. Dakle...

(?)

/nije uključen mikrofoni/

Molim Vas, predsjedavajuća...

SAFET KEŠO

Ja želim samo da podsjetim da je ovo saslušanje gospodina Konakovića, a ne slušanje gospodina Konakovića. Dakle...

SABINA ĆUDIĆ

Imamo po formatu koji smo ustanovili...

SAFET KEŠO

Dakle...

SABINA ĆUDIĆ

i za koji niste, kolega Kešo, imali nikakvih primjedbi, dala sam Vam uvodne napomene...

SAFET KEŠO

Nisam Vas...

SABINA ĆUDIĆ

i rekla sam da će također uvodnu napomenu...

SAFET KEŠO

Nisam Vas...

SABINA ĆUDIĆ

a prije nego što započne saslušanje...

SAFET KEŠO

Dakle, nisam Vas...

SABINA ĆUDIĆ

imati ministar.

(?)

/nije uključen mikrofoni/

SABINA ĆUDIĆ

Jesam, apsolutno detaljno obrazložila. Hvala.

ELMEDIN KONAKOVIĆ

Ja sam, gospodine Kešo, ministar vanjskih poslova BiH, predstavljam instituciju. Pozivam Vas da pošujete instituciju Ministarstva vanjskih poslova BiH u čije ime ja danas govorim i ja nikada neću biti saslušavam po mjerilima i standardima kako Vi mislite da bih trebao. Ja sam zato i došao ovdje i zato sam u uvodu rekao da je dobro da su ovi ljudi tu. I da Vam ponovim, gospodine Kešo, Vi biste kao član ove Komisije mogli barem nekad navratiti u Ministarstvo vanjskih poslova, mogli ste nekoga pitati šta je Zapadni Balkan, šta je ovaj format lidera, kad se ministri sastaju, kad ide Košarac, kad ide Amidžić, kad se u Berlinskom procesu ja sastajem sa Berbok, a kad se Borjana Krišto zajedno sa Vučićem i zajedno sa Ramom i ostalim liderima sastaje, gdje se sastaje i šta je tu uloga Ministarstva vanjskih poslova. Da ste to, gospodine Kešo, znali...

SABINA ĆUDIĆ

Ministre Konakoviću, moram Vas prekinuti. Kao što je Vaša uloga...

ELMEDIN KONAKOVIĆ

Vi mene nećete ušutiti, nije ovo ušutkivanje ministra...

SABINA ĆUDIĆ

Kao što je Vaša uloga...

ELMEDIN KONAKOVIĆ

Ja ću napraviti pres konferenciju, izaći napolje i pričati. Dakle, ne možete mi reći šta ću ja Vama reći.

SABINA ĆUDIĆ

da branite dignitet Vašeg Ministarstva...

ELMEDIN KONAKOVIĆ

Dobro.

SABINA ĆUDIĆ

u čemu Vas pozdravljam i podržavam, isto tako ću ja braniti dignitet ove Komisije i nećemo ovo pretvoriti u ad hoc napade niti na jednog člana ove Komisije. Pozivam Vas da se držite teme i da ne pretvarate ovo u dijalog sa bilo kojim članom Komisije niti raspravu po ličnoj osnovi, pogotovo ne uvrede jer ih nećemo tolerisati.

Hvala.

ELMEDIN KONAKOVIĆ

Možete li mi samo reći šta je uvreda?

SAFET KEŠO

Evo mogu ja reći šta je uvreda.

ELMEDIN KONAKOVIĆ

/nije uključen mikrofon/

Jeste ovako planirali saslušanje? Gledaju vas mediji što pravite ovaj cirkus...

(?)

/nije uključen mikrofon/

Dozvolite, dozvolite...

ELMEDIN KONAKOVIĆ

/nije uključen mikrofon/

SABINA ĆUDIĆ

Dakle, kolega i ministre Konakoviću, pozivam Vas da se u uvodnim napomenama referirate na temu današnjeg saslušanja, javnog saslušanja predviđenog članovima i namjerno citiranih Poslovnika i zakona koje sam danas citirala i da se držimo korektnog formata koji smo u

startu odredili. Nema potrebe za uvredama i ličnim napadima sa bilo koje strane. Podržavam Vas, ponavljam, u branjenju digniteta Ministarstva i mi ćemo braniti dignitet i ovog Doma i Komisije.

Hvala.

ELMEDIN KONAKOVIĆ

Da je gospodin Kešo znao kad se i kada sastaju lideri i šta je uloga Ministarstva vanjskih poslova ne bi govorio ono što u javnom prostoru govori. Dakle, ja danas ne bih došao na ovo saslušanje da u okviru...

ELMEDIN KONAKOVIĆ

/nije uključen mikrofon/

ove teme ne postoji tema koja se...

_____ (?)

/nije uključen mikrofon/

SAFET KEŠO

Poslovnička, molim Vas.

_____ (?)

/nije uključen mikrofon/

Dajte, molim Vas, predsjedavajuća.

SAFET KEŠO

Ja...

SABINA ĆUDIĆ

Kolega, molim Vas dozvolite da se završe uvodne...

ELMEDIN KONAKOVIĆ

koja se tiče firme koja se dovodi u kontekst i u vezu sa mnom. Ja sam zbog ovih ljudi, zbog transparentnosti i javnosti došao jer je to zaista tema o kojoj svako od nas treba da govori i prihvatam da treba da je potpuno rasvijetlimo do kraja. Da ste me pozvali danas kao ministra vanjskih poslova ja bih vam poslao dopis i ove slike i objasnio vam da kada se dešava samit lidera Zapadnog Balkana ministri vanjskih poslova, ako slučajno ne dobiju zadatak da dočekaju nekoga iz ranga predsjedništva ili iz ranga premijera, ne učestvuju, ne participiraju. Ne možete naći ni jednu sliku ni jednog ministra vanjskih poslova sa ovakvih samita. U Sjevernoj Makedoniji, u Crnoj Gori gdje vidite slike lidera. Dakle, Berlinski proces je druga stvar. O tome ste govorili javno, to nije ista tema. Ovo je tema - Plan rasta Zapadni Balkan. U okviru Plana rasta održavaju se samiti lidera.

Kada smo saznali, a ovdje je bilo dobrih pitanja, treba da se razjasne. 17.10. kada se donijela Odluka o uspostavi nekog tima za organizaciju ovog eventa ja sam bio na Lozani, na jednoj velikoj, u Lozani na jednoj velikoj multilateralnoj konferenciji u Ukrajini, predstavljao BiH tamo gdje nismo ranije bili zastupljeni i žao mi je što nisam bio na toj sjednici. Za organizaciju Samita, za dobijanje Samita, saznao sam iz medija jer tako treba. Ne zato što me Borjana Krišto

zaobilazila, nego vam time još jednom argumentiram da Ministarstvo vanjskih poslova, osim u dijelu tehničkog ili protokolarnog i jednog manjeg dijela, nema ulogu uopšte. Kada smo saznali da će se Samit održati bio sam zbog toga sretan.

Slažem se s Čauševićem da je ovo blamaža i da je BiH pretrpila reputacijske rizike. Nemam nikakvu odgovornost i žao mi je što nisam bio ni kad se zakazala ni kad se otkazala. Imam ovdje dokumente koji potvrđuju da sam bio u Lozani, ovlastio svog zamjenika da učestvuje na toj sjednici i nisam imao zaista informacije da smo dobili organizaciju Samita. Formiran je tim, imate Odluku, način na koji je formiran, pitajte kolege moje, pitat ću ih i ja. Dobili ste u odgovoru gospođe Krišto razloge tog kašnjenja, jer ona kaže da je službeno i zvanično, iako je u Crnoj Gori ona to potvrdila, dobila obavijest od Evropske unije u novembru da će se 04. i 05. decembra održati Samit u BiH. To neću odgovarati, to je njen dio nadležnosti. Dakle, ja kao ministar nemam dodirnih tačaka, ne učestvujem u sastancima, tamo idu Košarac i Amidžić, jer imate dvije teme, dva panela koji se često u okviru Zapadnog Balkana, Plana rasta, ljudi.

Dakle, da vam još jednom pojasnim našu ulogu. Mi smo životom lobirali i uspjeli izlobirati jedan važan proces za BiH i region. Kolega Bujar Osmani, ministar vanjskih poslova Sjeverne Makedonije je bio inicijator, a mi ministri vanjskih poslova regiona jednim glasom lobirali da se desi ono što je objavila Ursula von der Leyen na GLOBSEC-u prošle godine u Slovačkoj, teza – "More integration before membership" - više integracija prije članstva, jedan ekonomski proces u kom zemlje regiona dobijaju otvorena vrata Evropske unije, integrišu tamo svoje industrije, olakšavaju izvoz i plasman roba i usluga i tu se uloga Ministarstva vanjskih poslova završila. Kada su zvanično u maju prošle godine donijeli odluku o uspostavi sistema i plana rasta nikakvu dalju ulogu u funkcionisanju ovog formata Ministarstvo vanjskih poslova zaista nema.

Dakle, nisam bio kad je bila Odluka o timu, a još mi je više žao što nisam bio kad se donijela Odluka o otkazivanju, jer bih život svoj založio i založio bih sve što ima Ministarstvo da se desi Samit. Mi smo pokazali organizacijom simpozija, NATO simpozija, najbolje organizovanog, a imam i za to papire, ikad NATO simpozija sa rekordnom posjetom i brojem učesnika, kako se to radi kad mi vodimo proces, sa budžetom koji je 10 puta manji od ovog predviđenog.

SABINA ĆUDIĆ

Ministre Konakoviću, samo napomena...

ELMEDIN KONAKOVIĆ

Hoću da još jednu važnu stvar ako mogu...

SABINA ĆUDIĆ

za vrijeme.

ELMEDIN KONAKOVIĆ

Kako?

SABINA ĆUDIĆ

Samo napomena za vrijeme, isteklo je ali evo dajem Vam još.

ELMEDIN KONAKOVIĆ

Koliko imam? Koliko ja imam minuta? Oni 10, koliko ja?

SABINA ĆUDIĆ

10 minuta sam rekla da ćemo imati...

ELMEDIN KONAKOVIĆ

Pa meni ste uzeli bar pet u prekidanju, ako mogu, ako mogu završiti.

SABINA ĆUDIĆ

Pa zato Vam dajem dodatne dvije.

ELMEDIN KONAKOVIĆ

Hvala, hvala Vam, nisam to čuo, izvinite.

Hoću da kažem ovo što sam vidio da je Čaušević komentarisao. Ja ovdje imam e-maile koje sam Vam slao, molio Vas, ja sam odgovorio 09. odmah, molio Vas da 12. decembra bude ovo saslušanje. Ja sam, gospodine Čauševiću, možda niste vidjeli pa ste komentarisali, u Vaš odgovor, u Vaš zahtjev da bude u januaru, rekao ako je januar ovo su datumi, onda u nastavku napisao – ja Vas molim da ipak bude do kraja godine jer je tema aktuelna, jer je veoma važna. Moj prijedlog je bio da bude do kraja nove godine i evo neću zaista ništa dalje dramatizirati. Žao mi je što nije bila na vrijeme i možda sam malo pretjerao u komentaranju jer sam opet označen kao neka crna ovca u procesu za koji zaista nemam nikakvih dodirnih tačaka. Vrlo rado ću dalje dokumentacijom, argumentacijom odgovoriti na sva pitanja i završavam s ovim dijelom oko ove famozne firme.

Ja bih danas bio ovdje i da je firma žalitelj dobila posao, siguran sam, jer je s druge strane, u firmi žalitelj čovjek s kojim biste vi meni našli sliku iz mog mekteba kod mog efendije Mahmuta Kurtovića, jer sam ja s tim žaliteljem išao u mekteb pet, šest ili sedam godina i to što smo se slikali prilikom džamijske nastave bi vjerovatno mene danas dovelo ovdje da govorim jesam li imao neke veze. Ja nikakvih tačaka dodirnih, a i Vi ste to mogli provjeriti.

U smislu organizacije vrlo rado ću odgovarati šta je moj šef kabineta tamo radio, proceduru je proveo Sekretarijat, imam dopis, upit Sekretarijatu kako su proveli proceduru, dobio sam odgovore. Rekli su mi kako su birali, da li su izabrali, svakog pojedinačno nazovite da pitate jesam li se zanimao ko je i zaista nisam imao pojma ko je prijavljen i ko se takmiči, zato sam danas tu. Zato što to mora javnost znati. Imate pojedince koji su tamo odlučivali, ovdje su njihova imena i prezimena.

SABINA ĆUDIĆ

Hvala, ministre.

ELMEDIN KONAKOVIĆ

Dakle, o tome ću vrlo rado govoriti. A kažem vam, ja bih vjerovatno bio ovdje i da je ovaj moj mekteb drug dobio. Dakle, ovo je potrebno razjasniti do kraja kao što je potrebno da pogledati kako je ovaj Sekretarijat na isti način...

SABINA ĆUDIĆ

Hvala, ministre.

ELMEDIN KONAKOVIĆ

'22. godine dodijelio posao iste organizacije, istog eventa firmi u Ministarstvu Staše Košarca čiji je zamjenik tada Nedžad Branković bio porodično vezan s onim ko je dobio posao. Isti model...

SABINA ĆUDIĆ

Ministre Konakoviću, hvala.

ELMEDIN KONAKOVIĆ

tome se mora stati na kraj.

Hvala vam, izvinite za malo duži uvod.

ELMEDIN KONAKOVIĆ

/nije uključen mikrofoni/

Nemojte me molim vas prekidati...

SABINA ĆUDIĆ

Dajem riječ kolegi Bosiću, izvolite.

MLADEN BOSIĆ

Hvala, predsjedavajuća...

SABINA ĆUDIĆ

Podsjećam Vas, ovo tretiramo kao diskusiju, imate 10 minuta da postavite pitanje, dobijete odgovor, ostvarite diskusiju i ja ću voditi računa o vremenu. Nakon toga neka se pripremi kolega Omerović, a nakon toga dajem sebi riječ.

MLADEN BOSIĆ

Znači, ja sam malo iznenađen tonom ove rasprave i načinom na koji se vodi ovdje dijalog, a vrlo sam zadovoljan što je došlo do aktiviranja instituta parlamentarnog nadzora nad izvršnom vlašću. Znači, ja se ne sjećam da je ovako prije bilo moguće, tako da mogu da pohvalim i Vaše angažovanje i angažovanje predsjednice i Parlament ima svoju ulogu u funkcionisanju izvršne vlasti, prije svega što su to ljudi izabrani od naroda koji onda biraju izvršnu vlast. I sasvim logično bi bilo da se izvršna vlast tako i ponaša prema Parlamentu koji ih je postavio na te funkcije, a ne da predsjedavajuća Savjeta ministara, sad je već očigledno i to mogu da kažem otvoreno, ne želi da učestvuje u ovoj raspravi jer bi se sigurno našao neki termin i prilagodio njoj. Ali evo, to je odnos izvršne vlasti prema Parlamentu. To pokazuje otprilike kako funkcioniše ovaj politički sistem ovdje kod nas. Znači, uloga Parlamenta je jasna i ovaj institut parlamentarnog nadzora ako zaživi imat će veliku težinu na buduće političke odnose.

A šta je uloga izvršne vlasti. Znači, žao mi je što nema gospode Krišto ovdje da njoj postavim pitanje. Evo gospodin Konaković je tu, pa ću se koncentrisati na Ministarstvo inostranih poslova. Ja imam neko iskustvo sa Ministarstvom inostranih poslova jer sam tamo bio jedno vrijeme zamjenik ministra i bio sam ambasador BiH i znam šta je uloga svakog ministarstva inostranih poslova, ne Ministarstva inostranih poslova BiH nego svakog, je da unapređuje međunarodne odnose zemlje koju zastupa i da pravi što je moguće veći ugled te zemlje u svijetu i nema ni jednog ne samita, nego bilo kojeg događaja gdje ministarstva inostranih poslova u svim normalnim zemljama nisu uključeni u taj događaj. Ja sam bio ambasador, ko god dolazi, ambasador je taj koji vrši koordinaciju sa ministarstvom i sa Vašom delegacijom. Znači, Vi ste morali biti uključeni. Morao je, Ministarstvo inostranih poslova je moralo biti uključeno, ako ništa drugo ono zbog zadaće da bude neko ko je promoter ugleda BiH i evo sad, kad, mislim imat ćete ministre, imat ćete vremena poslije mene da odgovorite na ovo. Mislim, nema potrebe da se sad, ovaj...

(?)

/nije uključen mikrofoni/

MLADEN BOSIĆ

Neki dan sam čuo Vašu izjavu – politička scena je potpuno osvijetljena, nema više priča tri strane koje se svađaju, a naša zemlja je vratila ugled koji je godinama unazad poljuljan. Ja ne mogu da shvatim na osnovu čega, uzimajući u obzir i ovo o čemu sada pričamo. Vi kao ministar inostranih poslova možete nešto ovako da izjavite kad je upravo jasno svima da je suprotna stvar. Znači, nije ni imala ugled a nije ga uspjela ni vratiti sad. Priča o velikim uspjesima je nešto što je vrlo lako pobiti. Znači, imali ste kapacitet, da ste htjeli, ja ne znam da li znate za teoriju 20:80, znači u svakoj organizaciji, čak u dobroj organizaciji 20% ljudi zaposlenih radi 80% posla, a 80% ljudi radi 20% posla. Znači, niko ne može reći da su naši državni službenici i naši ljudi u ministarstvima toliko zauzeti da nisu mogli da se angažuju po ovom pitanju. Organizovane države za pet dana organizuju samit koji nije ranije ni bio predviđen. Imate kapacitete, odgovorni ste zbog ugleda države koju predstavljate u svijetu, a niste ništa poduzeli.

Znači, molim Vas, Vi tvrdite da niste znali da je zakazan Samit, pa sama ta činjenica je šokantna. Sama ona pokazuje o čemu se radi ovdje, o nefunkcionisanju institucija, ne samo Ministarstvo inostranih poslova, nego i svih drugih izvršne vlasti. Vi kažete da je na tom sastanku bio zamjenik ministra inostranih poslova, da ste ga Vi poslali, koji Vam nije rekao da je dogovoreno da će biti Samit. Ako je to tačno, a nemam razloga da ne vjerujem da je tačno, onda to govori o stanju u Ministarstvu inostranih poslova i Vašem odnosu prema Vašim, uslovno rečeno, podređenima.

SABINA ĆUDIĆ

Kolega Bosiću, isteklo je pet minuta, ukoliko u sklopu ove diskusije želite...

MLADEN BOSIĆ

Evo ja ću stat na ovom.

ELMEDIN KONAKOVIĆ
/nije uključen mikrofoni/

SABINA ĆUDIĆ

Pa dajem Vam upravo riječ, imate narednih pet minuta da odgovorite.

SAFET KEŠO

Izvinjavam se, prije toga bili su krivi navodi gospodina Konakovića na koje ja imam potrebu da odgovorim.

SABINA ĆUDIĆ

Dobro. Dozvolite sada pet minuta pa ćete odgovoriti na krive navode.

SAFET KEŠO

Pa prvo da mu odgovorim na krive navode koje je već izrekao.

SABINA ĆUDIĆ

Ovo je u sklopu diskusije, preuzimate vrijeme od kolege Bosića. Dat ću Vam naknadno riječ i imate pravo da diskutujete.

ELMEDIN KONAKOVIĆ

Gospodine Bosiću, nisam rekao. Ja sam rekao da je na toj sjednici kad je biran tim gospodin Brkić bio. tada smo znali da postoji Samit, ali je to već bilo kasno i upoznati smo i nisam mogao ni trebao, nisam ustvari morao, eto mogao sam saznati da ima Samit jer zaista, možda niste pratili ovaj trenutni proces Plana rasta, način na koji je Evropska unija omogućila ili na koji se opredijelila da organizuje cijeli koncept i da komunicira i vidjeli biste da je zaista ovo što govorim istina i lako je ovim ljudima to provjeriti.

Upravo zato što vodim računa o prioritetima i što smo našu zemlju vratili tamo gdje joj je mjesto, zato što je ona borbom te tri troglave aždaha zaista izgubila kredibilitet, jer kad Narodna skupština Republike Srpske usvaja zakone i stavove kojima želi nametnuti ovom ovdje Domu svoje neustavne nadležnosti, smatram to ljuljanjem i poljuljanim stanjem na diplomatskoj sceni jer nam se ljudi smiju. Ja sam, kad je bilo vrijeme Samita, i da se desio i da je trebalo da bude, ne bih bio u BiH jer je ovo na slici predsjednik OSCE-a sa kojim se taj dan rukujem i ranije sam rekao svojim ljudima da je ovo primarni prioritet moje zemlje. OSCE koji smo deblokirali, znate vjerovatno da se tamo odluke donese konsenzusom, da smo uspjeli riješiti pitanje četiri ključne pozicije, da je BiH prvi put nakon što smo izabrali nekoliko predstavnika u multilateralama koje ranije nikad ili dugo nisu vodili procese, a naša zemlja danas ima te čelnike, imala kandidata i za važne funkcije u OSCE-u. Dakle, imao sam posjetu ovog čovjeka, predsjednika OSCE-a koji me zamolio da budem i to je sigurno bilo za našu zemlju važnije mjesto za mene lično, jer da sam ostao ovdje zbog strukture ovih lidera, oni bi se sastajali, ja bih dole otišao i s nekim bih se uslikao. Ja sam na ovoj sesiji OSCE-a zajedno sa ljudima, sa našom ambasadoricom Dankom Savić, sa ljudima iz Misije napravio za BiH veoma važan posao zajedno sa kolegama. Dole sam o nama govorio, osvrnuo se i ne bih bio, gospodine Bosiću, tu baš za to što su ti prioriteti u mom

Ministarstvu poredani. Zato što je ova zemlja koja na svim multilateralama danas ima (?) svoje mjesto, zato što mi govorimo, obraćamo se, što nas se pita, sluša, što posjećujemo i što nam dolaze važni gosti. Koristim priliku da vas pozovem kao predstavnike Komisije sve zajedno u svoje Ministarstvo koje će imati pres konferenciju u petak da vidite rezultate našeg rada.

Vratit ću se samo još jednom. Ja sam primarno danas ovdje zbog tog koruptivnog skandala i za mene je on skandal i mora se osvijetliti ko je i da li je komunicirao, ko je dodijelio, kako je dodijelio, jesu imali papire, nisu imali papire i na to pitanje kad god hoćete pod poligrafom ću odgovarati zbog javnosti i zbog svoje odgovornosti. Zapadni Balkan Samit je, ljudi, drugačija struktura. Pozivam da mi date sliku jednu da vidim Abazovića u Crnoj Gori kako učestvuje u radu ili sada ministra Ibrahimovića. Da vidim u Sjevernoj Makedoniji ministre. Nema to, ljudi. Ovdje se sastaju predsjednici, premijeri država. Ovi ljudi o tome izvještavaju. Dakle, zaista, nije mi, ja malo imam emociju uvijek u svom obraćanju, nemojte se ljutiti i malo sam, što bi naš narod rekao, „grlati“, čujem se, galamim, ne mogu ja to kontrolisati pogotovo kad me optužujete za nešto što zaista ne radim. Znam ja da sam za svašta kriv, za ovo nisam kriv. Nemam nikakvu odgovornost, gospodine Bosiću. Dakle...

SABINA ĆUDIĆ

Hvala, kolega Konakoviću.

ELMEDIN KONAKOVIĆ

Isteklo, je li?

SABINA ĆUDIĆ

Upravo nam je isteklo 10 minuta.

ELMEDIN KONAKOVIĆ

Kako smo vrijeme ovo, šta je ovo...

SABINA ĆUDIĆ

Ispravka krivog navoda, kolega Omerović.

.....(?)

Mogu li ja završiti...

SABINA ĆUDIĆ

10 minuta je upravo isteklo. Napomenula sam Vam, dakle 10 minuta za ovu diskusiju, dat ću drugi krug...

.....(?)

/nije uključen mikrofoni/

SABINA ĆUDIĆ

10 minuta za diskusiju sam rekla. Dakle, jasno sam naznačila pravila...

(?)

/nije uključen mikrofón/

SABINA ĆUDIĆ

Kolega, imat ćemo drugi krug, imat ćete pravo na replike. Imat ćete pravo na riječ, ali nemojte da pojedinačno monopoliziramo diskusije.

Ispravka krivog navoda, diskusija kolega Omerović, zatim ja. Ukoliko nemamo više prijavljenih, imat ćemo priliku na replike.

Hvala Vam.

SAFET KEŠO

Može.

SABINA ĆUDIĆ

Kešo.

SAFET KEŠO

Može,

SABINA ĆUDIĆ

Kratko, dvije minute, ispravka krivog navoda.

SAFET KEŠO

Dakle, ovo je uobičajena praksa kolege, odnosno gospodina Konakovića u kojoj kad ga nešto pitate, ako samo jedna riječ ima koju on može konektovati da bi skočio na neko drugo polje on će to učiniti. Ja ga nisam pitao da li on treba biti prisutan na Samitu i govoriti tamo, to nije, znači ako mislite da nam držite predavanja na tu temu, ja Vas uopće o tome nisam pitao. Tvrdim, da Vas niko nije mogao, da ste pravi ministar vanjskih poslova, niko Vas nije mogao spriječiti da kažete na sjednici Vijeća ministara -- niko mi ugrabiti neće, ja ću stati na čelo tog Organizacionog odbora, ako već znate svoj posao. Pogledajte nadležnosti ministra vanjskih poslova, evo pored Vaše slike stoji na stranici, znači imate sve te nadležnosti i ja sam našao direktno u pet tačaka, direktno u pet tačaka, a sve je u nekih trinaest, dvanaest-trinaest. Dakle, nema nikakve dileme da mi imamo najveći problem u činjenici da ministar vanjskih poslova ne shvata da je on trebao učestvovati kao čovjek broj jedan u organizaciji ovoga Samita

SABINA ĆUDIĆ

Hvala, hvala.

SAFET KEŠO

u pripremi i organizaciji, a ne da drži govore na Zapadnom Balkanu, to niko ovdje nije rekao, pokušavamo objasniti

SABINA ĆUDIĆ

Hvala kolega Kešo

SAFET KEŠO

kolega Bosić. ali ne uspijevam.

SABINA ĆUDIĆ

nisam sigurna da se ovdje radilo o ispravci krivog navoda, isteklo Vam je vrijeme.

Kolega Omerović.

NIHAD OMEROVIĆ

Hvala dopredsjedavajuća.

Poštovane kolegice i kolege, članovi Komisije, uvaženi ministre Konakoviću, cijenjeni predstavnici medija, ja moram kazati za razliku od predlagača, koje smo imali priliku čuti, da sam bio protiv javnog saslušanja na ovu temu. Generalno sam instrument javnog saslušanja je pozitivna stvar i u osnovi ga podržavam, no kada je bilo u pitanju razmatranje ove problematike, problematike odgađanja Samita lidera EU u Neumu smatrao sam da će ovaj sami čin biti neproduktivan i da neće doprinijeti rješavanju ove problematike.

Ja bih ministru postavio sljedeća pitanja:

1. Da li je odlukom Vijeća ministara Ministarstvo vanjskih poslova bilo zaduženo za organizaciju Samita lidera Zapadnog Balkana?
2. I da li ste bili na odmoru ili radno angažovani kada se donijela Odluka o održavanju Samita, odnosno organizaciji Samita u Neumu 04. i 05. decembra?

Toliko i hvala.

SABINA ĆUDIĆ

Hvala kolega.

Ministar Konaković.

ELMEDIN KONAKOVIĆ

Nikakvom odlukom, imate Odluku o formiranju ovog Tima u kojem je, su propisane nadležnosti Tima, zato sam ja u uvodu o tome govorio. Jedan mali dio organizacijski je zaista bila nadležnost Ministarstva vanjskih poslova, nekih naših struktura, dijela Protokola, jer Vijeće ministara ima svoj, mi bi dali oficire za vezu, jer imamo dobre sposobne ljude i puno dobrih ljudi u Ministarstvu vanjskih poslova. Dakle, nisam zadužen. Sad ne možete napraviti jednu temu kada Ministarstvo, za primjer uzimam odgovor na Vaše pitanje, recimo vanjske trgovine ima neke međunarodne komunikacije, mi smo neki posrednik, ali nemamo nadležnost i odgovornost. Ja ne mogu uzet nadležnost Borjani Krišto, niti otići nametnut se na neki samit gdje nema nijednog mog kolege, ovo što govori gospodin Kešo, pa nema niko ljudi od ministara, nema, evo imate slike svih

samita od kad se priča o Zapadnom Balkanu. I još ću jednom ponovit, nisam odmarao nego sam bio na Malti u Valeti, pa sam iz Valete letio u, gdje sam išao u, ne znam, u Rim na sastanak sličnog formata koji organizuje ..., ja nisam kući sjedio. A kad smo čuli da ima Samit, jer ljudi ne moram to znat, šta je krucijalna činjenica, gospodine Bosiću znate da često pozivi, komunikacija prema Predsjedništvu, prema institucijama ide preko Ministarstva vanjskih poslova. U ovom slučaju Evropska komisija je donijela Odluku tad, kako kaže Krišto, nekad u novembru da nam to povjeri, to nije ni došlo u Ministarstvo vanjskih poslova, takav vam je format, oni to šalju direktno predsjedavajućoj Krišto i to ona delegira na način kako su i ranije organizovali predsjedavajući Vijeća ministara. Tako da ne možete ljudi izmisliti odgovornost Vijeća ministara zato što ovdje ima elemenata vanjske politike. Elemenata vanjske politike ima u skoro svim ministarstvima, al ne mogu ja trčat za tim procesima i voditi ih. Dakle, bio sam uposlen, bio sam na poslu, imao sam virusnu upalu štitne žlijezde, ja nisam bio na bolovanju, pa počeli praviti filmove kako umirem neki ljudi. Ja sam radio, nisam htio na bolovanje, jer imam posao, ne bi mogao biti u Neumu ljudi nikako. Dakle, OSCE sastanak je zaista bio važniji, ako niste propratite šta se tamo otkočilo. Ljudi na jednom mjestu su Lavrov i Blinken glasali da se otkoči proces, nisu ovi imali jedni pravo glasa. Dakle, konsenzus je postignut tamo gdje sjede ministar iz Izraela, ministar arapskih zemalja, gdje sjedi Lavrov, gdje sjedi Blinken i to je proces na kom sam zajedno, eno ga živog bivšeg predsjednika OSCE-a Bujara Osmanija, jednog divnog ministra vanjskih poslova, radio zajedno, to je za BiH bio prioritet. I kad smo čuli da ima Samit, prije odgađanja, smo rekli obavijestite ih samo da ja neću biti, neću biti u BiH. Ne bi išao u Neum da sam bio tu, šta ću, kako ću, pokucam dole i kažem izvinite ubacite me u neki protokol. Kao vaša je uloga, šta mi je to uloga, kad je ovo ljudi za BiH i za Evropsku uniju i evropsku priču bilo važnije. Dakle, radio sam, nemam zaduženja, u Odluci su jasno precizirane nadležnost, moj šef Kabineta kao dio sistema je bio tamo, bila su dva sastanka tog Organizacionog odbora na kom se nije moglo razgovarati o javnim nabavkama, niti one u tome učestvuju. Dakle, to možete sve saznat eventualno zanimanjem, a ... saslušanjem kod ovih drugih ljudi.

Hvala.

SABINA ĆUDIĆ

Izvinjavam se, najavila sam da ću sada govoriti, a daću Vam, naravno, riječ odmah.

MLADEN BOSIĆ

Krivi navod.

SABINA ĆUDIĆ

Molim?

MLADEN BOSIĆ

Krivi navod.

SABINA ĆUDIĆ

Krivi navod, izvolite, izvolite kolega Bosiću.

MLADEN BOSIĆ

Znači, ministre, Vi stalno govorite o sebi, gdje ste Vi bili. Mi govorimo o organizaciji ne Vašem poslu, nego o radu Ministarstva kojem ste Vi na čelu. Svaki, Vi ste ministar inostranih poslova, 24 sata na dan ste Vi ministar inostranih poslova, a Vi, i čija je dužnost da prezentuje svoju zemlju u najboljem svjetlu, a Vi svoju funkciju dijelite na svoju stranačku funkciju, borbu sa svojim političkim neprijateljima i

ELMEDIN KONAKOVIĆ

Ako može bez ovih neprimjerenih komentara, upozorite gospodina Bosića, ja sam ministar vanjskih poslova BiH, ništa stranačko ovdje nisam reka, nemojte gospodine Bosiću ni Vi to raditi.

MLADEN BOSIĆ

Evo samo jedno pitanje, evo javiću se, mislim jasno je sve ne, da ne gledamo, da ne duljimo

SABINA ĆUDIĆ

Kolega Bosiću, mogu li Vas zamoliti da se

MLADEN BOSIĆ

Smo jedno pitanje, molim Vas i ja završavam.

Ministre ko je odgovoran za ovu sramotu i propast Samita i ko je odgovarao ili protiv koga je pokrenut proces odgovornosti za ovo što se desilo?

Evo jedno pitanje, neću više ništa pitati.

SABINA ĆUDIĆ

Izvolite.

ELMEDIN KONAKOVIĆ

Najveću odgovornost za otkazivanje snosi predsjedavajuća Vijeća ministra, koja je dobila Odluku o organizaciji, smislila način kako da implementira, istina u veoma, veoma kratkim rokovima, povjerila to Sekretarijatu, zbog čije procedure i žalbe žalitelja, neću reći ono što sam rekao ranije, su procijenili da se ne može provest procedura javne nabavke i adekvatno organizovat sam Samit. Ponavljam, ono što sam javno, a i vama ovdje govorio, da sam bio na sjednici. I ovo ljudi, molim vas, molim vas, evo dokumenti, kada sam bio na putu kad se donijela Odluka, mislim da je to sad već Katar i Kuvajt, o otkazivanju, ta sjednica nije imala ni tačku dnevnog reda otkazivanje, kako bih znao da se pripremilo, nego je pod tačkom - Razno, delegirana od strane predsjedavajuće i glasalo se da se Samit otkaže. Zbog iskustva našeg u organizaciji Simpozija NATO i kapacitiranih ljudi sigurno bih tražio da nam se to povjeri, da Samit napravimo reprezentativnim, dostojnim u Banjaluci, u Sarajevu, u Brčko distriktu, bilo gdje, jer je to moguće, mi imamo kapacitete i to smo dokazali. Danas zato sjedim ovdje, u organizacijskom su, ja ne mogu

otet nadležnosti ljudi, to nije moje, a vanjska politika nije jedna cjelina da moram pokrit sva ministarstva u oblasti vanjske politike ...

SAFET KEŠO

Ispravka krivog navoda.

SABINA ĆUDIĆ

Hvala.

Izvinjavam se.

SAFET KEŠO

Ispravka krivog navoda.

Gospodin Konaković je kazao da on ne može nikom oteti nadležnosti, a riječ je upravo o nečem suprotnom, on nije smio dozvoliti da mu iko otme nadležnost, jer ovo je njegova, organizacija ovih skupova međunarodnog karaktera sa takvim potencijalom za jačanje ugleda zemlje, ne smije biti ničiji posao prije nego njegov.

SABINA ĆUDIĆ

Hvala, hvala kolega Kešo.

ELMEDIN KONAKOVIĆ

/nije uključen mikrofoni/

SABINA ĆUDIĆ

Izvolite.

ELMEDIN KONAKOVIĆ

Dakle, ako Evropska komisija, a govorio sam o tome direktno i provjerljivo i ja molim medije da to provjere, provjeri predsjedavajućoj Vijeća ministara, mojoj šefici, da organizuje Samit, ja njoj ne mogu oteti nadležnost i ne mogu joj reći ja ću biti predsjednik Organizacionog odbora i ja ću sve organizovati, to gospodine Kešo ne može, ja ne mogu kao ministar vanjskih poslova narediti predsjedavajućoj ko će biti u tom Organizacionom odboru i šta će biti delegirani zadaci. To Boga mi nije tačno.

SABINA ĆUDIĆ

Hvala, hvala.

SAFET KEŠO

Dakle, ali može, ali može

SABINA ĆUDIĆ

Dakle, molim Vas, molim Vas,

SAFET KEŠO

dakle, može čovjek na sjednici, pa nemojte da nas pravi budalom, čovjek može na sjednici

SABINA ĆUDIĆ

Molim Vas, kolega Kešo uspostavili smo neka pravila, ukoliko ćete pretvoriti ovo u isključivo diskusiju između Vas i ministra onda nema potrebe za nama ostalim, a koji bismo takođe želili da učestvujemo. Mislim da ste po minutaži imali sasvim dovoljno i imaćete ponovo, ali nećemo monopolizirati, barem ne u prvom krugu.

Dakle, najavila sam redoslijed, govoriću sada, a nakon mene se za diskusiju prijavio kolega Emrić, koji dolazi iz komisije čiji smo danas takođe domaćin, odnosno čijim članovima smo danas takođe domaćin.

Ministre Konakoviću, suština današnje diskusije svodi se na pitanje – da li ste imali dodirnih tačaka sa Samitom i organizacijom ovoga Samita? Pa da ne bi građani, mediji, kolege i u konačnici u izvještaju Parlamentarna skupština BiH bili uskraćeni za precizne podatke, ja ću ovdje citirati „Službeni glasnik“, „Službeni list BiH“, br. 73/24 i objavljenu Odluku od 17.10.2024. godine, Odluku o formiranju Tima za pripremu i organizaciju Samita lidera Zapadnog Balkana i Evropske unije u BiH. U listi članova Tima ističe se jedna činjenica, odnosno jasna je jedna činjenica, da jedino ministarstvo u Vijeću ministara koje ima dva člana Organizacionog tima je Vaše Ministarstvo, odnosno Ministarstvo na čelu kog ste Vi, tj. Ministarstvo vanjskih poslova. Dakle, odmah iza šefa Kabineta predsjedavajuće Vijeća ministara BiH nalazi se šef Kabineta ministra vanjskih poslova, gospodin Zlatan Burzić kao član, a zatim, ponavljam jedino ministarstvo koje u Organizacionom timu ima i drugog člana, nalazi se i načelnik Odjela za diplomatski protokol u Ministarstvu vanjskih poslova BiH gospodin Mirsad Bešić kao član čiji ste takođe Vi rukovodioc.

Idemo dalje, u zvaničnom dokumentu, koji nam je danas dostavila predsjedavajuća Krišto, ponavljam van zakonskog roka najavljujući njeno odsustvo, u obrazloženju pismenom o načinu i toku djelovanja vezano za ovaj Samit i njegovo otkazivanje stoji, citiram, sukladno Zaključku sa sastanka Radnog tima, pa ću ovdje ponovo napomenuti Radnog tima u kom su dva predstavnika Vašeg Ministarstva, a prije nego što i citiram napomenuću i sljedeću činjenicu, ne postoje ili ne bi trebalo u jednom ministarstvu da postoje dvije bliže osobe od samog ministra ili ministrice, to su šef ili šefica kabineta tog ministra i zamjenik ili zamjenica ministra. Te tako kada ste pismeno ovlastili zamjenika ministra da prisustvuje na ovoj sjednici, a pismeno ste ovlastili zamjenika ministra da prisustvuje na ovoj sjednici, pretpostavljam da ste informisani od dvije najbliže osobe, dakle šefa kabineta i zamjenika ministra, o dnevnom redu, usvojenim odlukama i preuzetim obavezama.

A vratimo se sada na pismeno obrazloženje predsjedavajuće Krišto – Sukladno Zaključku sa sastanka Radnog tima Ministarstvo finansija i trezora BiH pripremilo je i u proceduru dostavilo Odluku o preraspodjeli sredstava iz Budžeta za 2024. godinu Ministarstva odbrane BiH, Ministarstva vanjskih poslova BiH i Ministarstva pravde BiH u Proračun Generalnog tajništva Vijeća ministara BiH za 2024. godinu obzirom da u tom trenutku u tekućoj pričuvi nije bilo

dostatnih sredstava. Odluka je usvojena na 44. izvanrednoj telefonskoj sjednici Vijeća ministara BiH 07. studenog, tj. novembra 2024. godine.

Ne samo da čelni ljudi Vašeg ministarstva su u Organizacionom timu, već je Vaše Ministarstvo jedno od svega tri ministarstva iz čijeg budžeta su se izdvojila sredstva za organizaciju Samita. Pretpostavljam, sudeći po logici koju ste nam do sada izložili da niste znali, ne samo da organizuju čelni ljudi Vašeg ministarstva Samit, već onda shodno tome, pošto ste u toj mjeri bili neinformisani o Samitu i kako kažete nemate baš nikakvih dodirnih tačaka, niste znali ni da finansira ministarstvo na čelu kog ste Vi Samit.

Idemo dalje, isto tako morali biste biti upoznati sa Rješenjem Ureda za razmatranje žalbi od 04.12.2024., tragično na datum kada se ovaj Samit trebao desiti i da napomenemo kada govorite o važnosti OSCE-ovog skupa Marta Kos komesarka, dakle prva zvanična posjeta i posjeta Zapadnom Balkanu, koja je slavodobitno najavila dolazak i podršku evropskom putu, između ostalog i BiH, dakle na taj datum usvaja se žalba i poništava se predmetni postupak javne nabavke u cjelosti, o povratku sredstava uplaćenih na ime naknada za pokretanje žalbenog postupka ovo tijelo donijeće posebnu rješenje.

A saću Vam citirati ključne dijelove te Odluke, pod naslovom -- Žalba je osnovana. Pa imate tako -- Po ocjeni ovog tijela smatra, ovo tijelo smatra da se u ovom postupku ..., da su u ovom postupku nastale apsolutno bitne povrede zakona propisane članom 103. stav (1) Zakona o javnim nabavkama. Zatim imate, s obzirom na navedeno imajući u vidu propisanu odredbu evidentno je da je ugovorni organ načinio apsolutno bitne povrede zakona o kojima ovo tijelo vodi računa po službenoj dužnosti, te možda najstrašnije, članom 103. stav (1) tačka a) Zakona definirano je neusklađenost tenderske dokumentacije s ovim Zakonom ili podzakonskim aktima, koja je usljed nedorečenosti, proturječnosti ili nejasnosti dovela do nemogućnosti utvrđivanja osnovanosti žalbenih navoda i koja je usljed bitnih propusta dovela do narušavanja osnovnih principa ovog Zakona, odnosno nezakonite dodjele ugovora.

E sada, kad Vi kažete, što mi je iskreno najšokantije u toku današnjeg saslušanja, da ste znali da je otkazan da biste se i rukama i nogama borili da se ne otkaže i da biste bili protiv Odluke koju je Vijeće ministara u konačnici, dakle, usvojilo o otkazivanju, dakle Vijeće ministara ... Odluka o obustavljanju postupka javne nabavke usluga organizacije događaja organizacija Samite lidera Zapadnog Balkana i Evropske unije u BiH, koji je usvojilo Vijeće ministara, mene sada interesuje kada kažete da biste se i rukama i nogama borili da ne dođe do poništavanja Odluke -- da li to znači da se ne slažete sa ocjenama Ureda za razmatranje žalbi da je apsolutno došlo do povreda zakona, i to ozbiljnih povreda zakona, u postupku javne nabavke, da li smatrate ukoliko ste bili odsutni kada se usvajala Odluka o obustavi postupka, da biste Vi glasali protiv obustave postupka uprkos strašnim navodima, rekla bih, Ureda za razmatranje žalbi i ukoliko bi da li biste onda preuzeli odgovornost i za nezakonite radnje, odnosno šta smatrate da je bio ispravan ishod da se uprkos ustanovljenim nezakonitostima nastavi sa procesom? I u konačnici interesuje me, s obzirom da ste već jasno dali do znanja da ne mislite da ste na bilo koji način odgovorni, ko jeste odgovoran? S obzirom da Zakon o Vijeću ministara BiH, dakle član 24. kaže -- da radom Generalnog tajništva rukovodi generalni tajnik, kojeg imenuje i razrješava Vijeće ministara. Pa ako smatrate da je generalni tajnik ili čitav Ured učinio ove nezakonitosti smatrate li da čitava

odgovornost ne leže na Vama, na kolegici, odnosno predsjedateljici Krišto, te da Generalno tajništvo treba podnijeti ostavke, odnosno snositi u konačnici posljedice?

Hvala vam.

ELMEDIN KONAKOVIĆ

Je li ja?

SABINA ĆUDIĆ

Da.

ELMEDIN KONAKOVIĆ

E, hvala.

Znate li Vi, predsjedavajuća Ćudić, šta su nadležnosti ovog Organizacionog odbora, koliko je ovaj Organizacioni odbor puta zasjedao i šta je bila tema sastanaka ovog Organizacionog odbora? Oni koji organizuju velike ivente znaju šta je organizacioni odbor i ovaj Organizacioni odbor ne može provest proceduru javne nabavke, niti je znao kako se ona provodi, a ja ću Vam reći imali su dva sastanka na kojima su informisani od šefa Kabineta predsjedavajuće Krišto o procesima koji, kako ste ispravno rekli, vodi Sekretarijat. Robert Vidović je potpisnik i ja se pridružujem svima, ako ima potrebe ili ajmo pokrenut predmet, hajmo prijavit, mislim da je neko i primijenio, i pozdravljam istragu Tužilaštva koje će ustvrdit. Da li su ovi ljudi iz odgovora meni, ne znam da li ste Vi pitali Sekretarijat, ja ću Vam dati njihov odgovor, ovdje tačno piše kako su, na koji su način i koji su državni službenici bili u komisiji koja je provodila tu vrstu javne nabavke i odabrali upravo ovu firmu. Dakle, ono što ste Vi kao šokirani i ja sam šokiran. Jer recimo Vaš je predsjednik Forto istoj osobi dodijelio posao za organizaciju onog superdigitalnog iverenta i pitajte ga Vi, pošto ste mu šefica Glavnog odbora, jesam li ga ja slučajno kontaktirao i tražio da mu ovaj povjeri posao, pa onda stavite to u kontekst mojih izjava i mog ponašanja i po ovom predmetu, ja se u to nikom ne petljam, nikada ne intervenišem i ni za koga ne intervenišem. Nadite mi jednog da sam to ikad uradio. I zato me to iritira, ovi Vaši nastupi, ovi teatri u kojim hoćete da me ponizite za nešto za šta nisam odgovoran, jer su zamislite moje najbliže osobe bile dio, pazite sad novinari, Organizacionog odbora. Vas molim da samo pogledate šta je uradio taj Organizacioni odbor, dva sastanka, cijelu proceduru, podijeliću vam ove dokumente koje ja imam. Volio bih da ih i Vi imate, volio bi da ste se raspitali u Sekretarijatu, volio bi da ste službeno dobili, jer ljudi su, pazite, iako su odgovorni meni odgovorili u dva dana. ... Dakle, ja ovdje njima kažem – molim vas da mi date informaciju šta je bilo, detaljna procedura provođenje, ko je radio, ko su članovi Tima za pripremu? I dobijem adekvatan odgovor. Imate sve ljudi u ... podijeliću vam to. Dakle, nemojte mi trpat nešto, kao Vi ste šokirani što sam ja to tako. Čime ste šokirani? ... da li se ne slažem s uredbom, da li ja, znate šta bi ja uradio? Ja bi to organizovao za 20 hiljada maraka onako kako sam organizovao simpozijum. Naravno, da ne bih se uplitao u Ured za žalbe, kao što Vi insinuirate i trebali ste se prekinut sama sebe, jer ste zaista prešli granicu dobrog ukusa, meni fakturišete da bih ja zaustavio Ured za žalbe, koji je rekao ne može ova procedura. Ne, gospođo Ćudić, nego bih rekao zaustavite to, dajte meni, s ovim timom ljudi koji su doveli 289 učesnika Simpozija NATO-a ovdje u ove prostorije, koji su imali 54 zemlje učesnice i dobili desetke za ocjenu, sa pet ljudi iz Kabineta i resursima Ministarstva vanjskih poslova, za dvadeset i kusur hiljada maraka. Neopravdanim smatram i ovaj iznos koji se našao 250 hiljada u Neumu. Znate šta su obaveze? Da platite ... smještaj, da napravite u okviru tog hotela dobre, fine, moderne ove bimeve, velike video

zidove, da imate dobar zvuk i da ljudi dođu i plus one delegacije koje dolaze, kao i moja, same sebi plaćaju sobe, pa vam onda dobar hotelijer izađe u susret, kao što je nama izašao u susret. To bih ja uradio i time bih ja životom nikada protiv zakona. kako mi insinuirate, jer Vi mislite da ja trebam znat kad se neko moj prijavljuje na tender. Ja sam u jednoj televizijskoj emisiji rekao zato što je ovo specifična situacija, što ste ljude meni bliske, a koji su u ovom predmetu možda i prešli granicu zakona u drugim predmetima označili i korumpiranim tužiocima izložili samo zato što su meni bliski. E pa to ja ne dam i nema ovdje saslušanja recete mi šta ću reć, ne možete mi to.

SABINA ĆUDIĆ

Hvala kolega Konaković, isteklo je vrijeme.

ELMEDIN KONAKOVIĆ

Hvala i Vama i nemojte mi insinuirat, ubuduće ako budete insinuirali da sam ja, da bih ja prekinuo to protiv zakona, ja ću Vas upozorit.

SABINA ĆUDIĆ

Prije nego šta dam riječi kolegi Emriću, uputiću samo jednu, a ja bih rekla vrlo važnu ispravku krivog navoda i nadam se da je to bio Vaš lapsus, jer je to predmet zapravo ključnog dijela žalbe na ovaj postupak, a to je da je identična firma organizovala Digitalni samit i trebala organizovati ovaj Samit, jer se, prema navodima, upravo pomenutih firmi, radi o dvije firme različite u vlasništvu oca i ćerke, tvrdeći da se radi o apsolutno različitim firmama, a Vi ste ih sad upravo nazvali identičnim, što bi moglo biti problematično za taj proces.

ELEMDIN KONAKOVIĆ

Ispravka krivog navoda, rekao sam – ista osoba, a ne ista firma. I Vas molim i medije molim da Sabinu Ćudić korigujete, rekao sam – radi se o istoj osobi i nemojte izvrtati.

SABINA ĆUDIĆ

Hvala, zapisnik će svakako biti dostupan

ELMEDIN KONAKOVIĆ

E pa zapisnik mi pošaljite.

SABINA ĆUDIĆ

i Parlamentarnoj skupštini.

Dajem riječ kolegi Emriću, nakon njega prijavio se kolega Begić.

Napominjem, kolege su članovi Komisije za borbu protiv korupcije, kojima smo takođe danas domaćini, koji mogu učestvovati u diskusiji, ali ne i u izjašnjavanju o prijedlozima zaključaka.

Izvolite.

JASMIN EMRIĆ

Zahvaljujem predsjedavajuća i zahvaljujem Komisiji što su dozvolili ili odlučili da i mi kao članovi Komisije za borbu protiv korupcije prisustvujemo današnjem saslušanju. A razlog zašto smo mi zainteresirani za ovo saslušanje je taj što smo mi na sjednici Komisije za borbu protiv korupcije također razmišljali o otvaranju ovog postupka parlamentarnog nadzora utvrđivanja odgovornosti u dva segmenta. Prvi segment je nanesena šteta ugledu BiH zbog toga što je otkazan vrlo važan predmetni Samit. A drugi segment je koruptivne radnje ili sumnja ili percepcija u načini izbora dobavljača, odnosno firme koja je trebala izvršiti pripremu i organizaciju predmetnog Samita u Neumu.

Dakle, ova diskusija je već dala odgovore na neka pitanja, koja sam i ja pripremio kao član Komisije za borbu protiv korupcije, a koja će nam sigurno biti važna u daljnjem postupku, jer mi u Komisiji za borbu protiv korupcije, mi članovi Komisije za borbu protiv korupcije nećemo stati u ovom postupku, sagledaćemo cjelokupno dostavljenu dokumentaciju kao i ovo saslušanje, te odlučiti o daljnjem toku postupka koji će voditi Komisija za borbu protiv korupcije. Ali su važna neka pitanja i ja sam postavio, pripremio pitanja uzimajući u obzir da će biti i predsjedavajuća vijeća prisutna, predsjedavajuća Vijeća ministara gospođa Borjana Krišto prisutna, međutim nije, ali stoga se zahvaljujem ministru vanjskih poslova koji se odazvao ovom postupku parlamentarnog nadzora, koji se zove saslušanje. Ali ne treba sa ovakvim emocijama raspravljati, mi nismo ovdje došli da bilo koga unaprijed optužimo, već da sagledamo činjenice i utvrdimo stvarno stanje, te na osnovu tih činjenica da donesemo određene odluke i zaključke. U tom kontekstu je ova kooperativnost ministra vanjskih poslova jako potrebna i korisna. Neka pitanja ću ponoviti, ali to je iz razloga, uvaženi ministre Konakoviću, da mi u pisanom obliku odgovorite za potrebe Komisije za borbu protiv korupcije u daljnjim postupcima.

Dakle, prvo pitanje koje sam pripremio, a već ste na neki način odgovorili i uvodničarima i ostalim kolegicama i kolegama koji su postavljali, pitanje glasi:

Molim Vas da nas informirate o uključenosti Ministarstva vanjskih poslova BiH i Vašoj uključenosti u pripremi i organizaciji događaja Samita lidera Zapadnog Balkana i EU u BiH. Dakle, vrlo je važno da vidimo na koji način ste Vi bili uključeni, dali ste odgovore, ali je važno, molim Vas, da precizno, kratko, u pisanom obliku odgovorite meni kao članu Komisije za borbu protiv korupcije koje odgovore ću kasnije koristiti u daljnjim postupcima. Kolegica Sabina Ćudić je već kroz citiranje „Službenog glasnika BiH“ iznijela ovdje Vašu uključenost, odnosno uključenost Vašeg ministarstva, ali je moja namjera bila da to od Vas čujemo i da nam Vi to kažete i mislim da je bilo primjereno da nam odmah u početku to kažete da je, da su Vaši predstavnici bili, odnosno da su imenovani u Tim za organiziranje Samita i koji je njihov zadatak, odnosno koja je Vaša možda i posredna, ali i neposredna odgovornost u pripremi i organizaciji Samita? I mislim da tada ne bi bilo ovakve žučne rasprave da ste i Vi na taj način, ministre, odmah pristupili da tako kažem, da neopterećeno kažete Vašu stvarnu uključenost i na neki način postavljamo pitanje zašto Vas predsjedavajuća Vijeća ministara nije stvarno uključila onoliko koliko je bilo potrebno? Evo, to ostajemo otvoreno pitanje, očigledno nema kvalitetne komunikacije u tom segmentu, odnosno u ovom konkretnom slučaju nije bilo, bar sam ja tako zaključio u ovoj dosadašnjoj raspravi, odnosno u ovom dosadašnjem postupku parlamentarnog nadzora.

Drugo pitanje, vrlo važno:

Koja je bila uloga i odgovornost Ministarstva vanjskih poslova BiH i Vaša uloga i odgovornost kao rukovodioca u pripremi i organizaciji događaja Samita lidera Zapadnog Balkana i EU u BiH? Takođe ćete odgovoriti. Kada ste Vi prvi put dobili saznanje ili informaciju, već ste o tome govorili ne trebate ponavljati, ali u pisanom obliku, molim Vas, da mi dostavite, i od koga, kada, i od koga da će BiH biti domaćin događaja Samit lidera Zapadnog Balkana i EU u BiH, a koji je trebao biti održan u Neumu 04. i 05. decembra prošle godine? Tko je predložio članove i tko je donio odluku ili rješenje ili zaključak? Naravno, 17.10. prošle godine Vijeće ministara je imenovalo Tim, ali molim Vas da odgovorite tko je predložio članove, znamo tko je donio odluku i koji je bio zadatak Organizacionog odbora ili Tima? Jer zadatak je jasno sročćen. Da li je taj zadatak izvršen i u kojoj mjeri i u kojem opsegu i koja je bila Vaša uključenost ili odgovornost u ... ili predstavnika Ministarstva u izvršavanju tog zadatka?

SABINA ĆUDIĆ

Kolega Emrić, oprostite što Vas prekidam, prvo upozoriću Vas na vrijeme, a drugo s obzirom da su mnoge od ovih oblasti već adresirane, ja bih Vas zamolila da dostavite ministru ta pitanja kako ste i sami naglasili, ako tražite pismeni odgovor moraćete i Vi poslati napismeno ta pitanja, ovaj, i da ne monopoliziramo ovu diskusiju ponavljajući ono što, kako ste i sami na početku naglasili, jer smo već dobili odgovore. Evo, ja Vam dajem još dvije minute da završavate, pa ako smatrate da nešto postoji što se mora adresirati odmah da to tako i naglasite.

JASMIN EMRIĆ

Da, ovo je bio uvodni dio ne znajući da će biti rasprava, ja nisam mogao pretpostaviti kakva će biti ranije rasprava i koja će pitanja kolegice i kolege postaviti.

Sada idemo dalje i možete odmah odgovarati uvaženi ministre. Da li su predstavnici ili službenici Ministarstva vanjskih poslova bili članovi Komisije za javne nabavke u postupku javne nabavke za usluge organizacije Samita lidera Zapadnog Balkana i EU u BiH?

Da li Vam je poznata uloga i odgovornost Generalnog sekretarijata Vijeća ministara u pripremi i organizaciji predmetnog Samita? Znači, da li je Vama poznata uloga i odgovornost? Da li Vam je poznato tko je i na koji način odredio ulogu i odgovornost i zadatke Generalnom sekretarijatu Vijeća ministara BiH, kojim aktom, u kojoj službenoj korespondenciji? Da li Vam je poznato tko je odredio članove i imenovao Komisiju za javne nabavke? Da li ste bili upoznati tko su članovi Komisije za javne nabavke? Da li ste na bilo koji način bili upoznati o postupku javne nabavke za usluge organiziranja Samita? Da li ste na bilo koji način bili upoznati sa predmetom i sadržajem tenderske dokumentacije? Da li Vam je poznato tko je bio mentor i nosilac izrade tenderske dokumentacije u postupku javne nabavke usluga organizacije događaja Samite lidera Zapadnog Balkana i EU u BiH?

SABINA ĆUDIĆ

Vrijeme.

JASMIN EMRIĆ

Da li Vam je poznata odluka ugovornog organa kojom je na prijedlog Komisije za javne nabavke kao najpovoljniji ponuđač izabrana firma „MindSet“ d.o.o. iz Sarajeva? Da li ste čuli za to, da li ste čuli za Privredno društvo „MITA Group“ sa sjedištem u Sarajevu, da li poznajete direktora te firme? Da li Vam je poznato da je ponuđač MITA Group uložila

SABINA ĆUDIĆ

Kolega Ermić...

JASMIN EMRIĆ

žalbu? Molim Vas da pročitam pitanje.

SABINA ĆUDIĆ

Moram Vas upozoriti na vrijeme

JASMIN EMRIĆ

Da, da, evo, ne još četiri pitanja.

Da li Vam je poznato da je

SABINA ĆUDIĆ

Milim da nemamo vrijeme za još četiri pitanja, niti mislim da imamo

JASMIN EMRIĆ

/nije uključen mikrofoni/

... ovo je vrlo važno da znamo činjenice. uvažena predsjedavajuća.

SABINA ĆUDIĆ

Slažem se apsolutno kolega

JASMIN EMRIĆ

/nije uključen mikrofoni/

Ovo su činjenice koje su važne nama u Komisiji za borbu protiv korupcije, ovo je, ovaj dio koruptivni ...

SABINA ĆUDIĆ

Ne sporim apsolutno kolega Emrić o važnosti ovih podataka.

JASMIN EMRIĆ

/nije uključen mikrofoni/

.... još dva pitanja.

Da li ste čuli za Privredno društvo „MindSet“ d.o.o. sa sjedištem

SABINA ĆUDIĆ

Upalite mikrofon kolega Emriću, upalite mikrofon.

JASMIN EMRIĆ

Da li ste čuli za Privredno društvo „MindSet“ d.o.o. sa sjedištem u Paromlinskoj br. 42. u Sarajevu, da li Vam je poznat osnivač i predstavnik te firme, gospoda Memija Emina, da li ste u rodbinskim, prijateljskim, poslovnim ili nekim drugim vezama sa uvaženom gospodom Eminom Memijom?

Hvala.

SABINA ĆUDIĆ

Hvala.

ELMEDIN KONAKOVIĆ

Gospodine Emriću, hvala Vam za najkonkretnija i po mom mišljenju suštinski najvažnija pitanja današnje rasprave. Možda niste čuli, ja sam u uvodnom obraćanju, zbog toga sam reagovao kad su postavljali kolege, postavljali pitanja, tražio da uvodno objasnim prvo ulogu i poziciju svojih saradnika, a rekao sam i zašto, jer po svim procedurama u organizaciji nemamo ljudi ništa, ali je važno da se zna ovo što ste Vi sad pitali i ja sam za to danas ovdje. Znamo ja i Vi da se nismo dogovarali i da su ova pitanja Vaša. Dakle, niko iz Ministarstva vanjskih poslova nije učestvovao u dijelu javnih nabavki, to su radili, a to sam dobio u odgovoru Sekretarijata, državni službenici koji se unutar Sekretarijata na takav način svojim poslom bave godinama i mogu reći da sam kad sam ovo napravio mali uvid i našao 2022. godinu sličan proces koji je proveo Sekretarijat i povezanost tadašnjeg zamjenika ministra rodbinsku vidio da je to isti modus operandi. Ne znam, ne znam ko, kako, na koji način, vjerovatno koristeći svoju zakonsku ulogu u procesu javnih nabavki i to je važno ko su bili ljudi otkrijete, s kim su komunicirali, kako su oni to izabrali. Ja sam i to rekao, direktor MITA Group je išao sa mnom u mekteb šest ili sedam godina, taj žalitelj i on zna lično da nemam nikakve veze sa ovom cijelom procedurom. Dakle, to bi bila druga, drugi razlog kad sam rekao vi bi mene danas ovdje doveli i da je ovaj drugi doveo, imam sliku s njim.

Dakle, potpuno se s Vama slažem, suština je i pozdravio sam Vaše prisustvo, jer ovaj dio koji može bit koruptivan treba spasit državu BiH od onoga u čemu sada mi dominiramo. Nije mi bio poznat postupak i predmet, nisu odluku o toj nabavci donosili u Organizacionom odboru, tamo gdje sjede moja dva saradnika, a u uvodu sam rekao i zašto. Šta je naša uloga? Dio protokola, oficiri za vezu u slučaju potrebe dobre komunikacije i slanje dokumenata, ako je to, to je zaista ljudi tako. Dakle, ova pitanja su nešto što treba potpuno razjasniti.

Poznato mi je iz medija da je firma Majnset firma u vlasništvu čovjeka meni bliskog, da su on i da je njegova ćerka direktorica, kada se pojavila ova tema u javnosti saznao sam da ima novu firmu. Čovjek koji, dok se ta istraga ne završi, ja još neću tvrdit da ne bi oštetio istragu, može biti da je izložen različitim pravosudno-medijskim pritiscima samo zato što je meni blizak. Ja i dalje tražim od tužioca da istraže, da blek taj dovedu do kraja, da mediji to isprate i da vidimo te argumente. Možda zbog toga mi nije, a i da jest zna da ne bih, jer nisam ni kod Forte zvao da neko nekome dodijeli bilo kakav posao. Emina Memija je njegova ćerka, o tome sam saznao iz medija,

da me pitao slučajno, da je reko – šta mis? Rekao bih – nemoj bit lud. A da mu kažem nemoj sada kad su ti blokirali kompletnu imovinu i kad ne možeš radit nemoj se prijavljivat na tendere to ne bi kao čovjek mogao. Dakle, to je kompleksno i zato je važno da mi danas o tome govorimo. Nemam nikakvih dodirnih tačaka s tim, znam čovjeka, znam mu ćerku, da me pitao rekao bi – ne budi budala. I pogotovo ovaj dio, da li je s nekim komunicirao, je li neko iz ove grupi ljudi koja donosi odluku, pozivam sve nadležne organe da istraže kako je došlo do ove odluke. Pozdravljam Ured za žalbe koji je donio odluku ustanovivši da nema dokumenata. Kako je moglo to proći? Dakle, to je pitanje za naše institucije, za naše istražne organe i vi znate dobro šta ja mislim o dijelu pravosuđa. Pozivam zdravi dio da sve pregleda, sve utvrdi i ja ću vama vrlo rado dostavit u pisanoj formi sve informacije, a mislim da sam vam na ove odgovorio.

SABINA ĆUDIĆ

Hvala ministre Konaković.

Dajem riječ gospodinu Begiću, takođe članu Komisije za borbu protiv korupcije i s obzirom da nemamo više prijavljenih.

(?)

/nije uključen mikrofon/

Daću Vam završne napomene od tri minute.

Izvolite kolega Begiću.

ZLATAN BEGIĆ

Poštovana predsjedavajuća, dame i gospodo, predstavnici medija, administrativno-tehničke službe Vijeća ministara i Parlamentarne skupštine BiH sve vas lijepo pozdravljam.

Dozvolite mi, vrlo kratko, na početku da se zahvalim na pozivu i na gostoprimstvu i mogućnosti da čujemo ova, po meni, vrlo korektna, korektno postavljena pitanja i naravno odgovore na pitanja, koja će pomoći u rasvjetljivanju ove čitave situacije. Zahvaljujem i predsjedavajućoj na vrlo korektnom vođenju ove sjednice i kako ne bismo mi ispred Komisije za borbu protiv korupcije bili prinuđeni da pozivamo gospodina ministra na saslušanje i pred tu Komisiju u mnogome je pomoglo i ovo saslušanje danas, a meni je ostalo jedno pitanje.

Dakle, slušajući ovu diskusiju, raspravu, onda sam se sjetio da sam to čitao i u medijima, ali nisam vidio nikakvu službenu informaciju, pa bi zamolio ne samo gospodina ministra, nego i ovdje prisutne kolegice i kolege ukoliko imaju saznanja, a zbog budućeg rada Komisije za borbu protiv korupcije, ovdje su pomenute falsifikovane isprave. Falsifikat podrazumijeva u ovakvim postupcima i krivično djelo, pa bi zamolio ako iko ima saznanja ovdje, mi ćemo naravno koristiti i druge kanale da dođemo do pouzdanih informacija, zvanične, institucionalne, ali ako smo već svi okupljeni na ovom mjestu i mislim da je dobro što smo okupljeni, mislim da je dobro da razgovaramo, da pitamo jedni druge, da kažemo jedni drugima, da na taj način i usmjeravamo jedni druge u pravom smjeru. Ako smo se već okupili, ako neko ima, ali zvaničnu informaciju, zvaničnu ne poluinformaciju da nam kaže da li zna ko je izdao te falsifikovane isprave, je li to ta firma priredila, izdala te izjave, da tako kažemo, podmetnula ili su u pitanju neki drugi subjekti?

Da li su u pitanju javno-pravni ili privatno-pravni subjekti? Jer to nama u Komisiji za borbu protiv korupcije će biti jako važno i kao što rekoh da ne bismo, cijeneći vrijeme gospodina ministra, da ne bismo ga pozivali i pred tu Komisiju radi tog detalja, pa eto ako neko ima informaciju, ali provjerenu, službeno molio bi da podijeli sa članovima ove Komisije.

Hvala vam još jednom na svemu.

SABINA ĆUDIĆ

Hvala kolega Begić.

Mislim da nema potreba da ministar odgovara na ovo pitanje, s obzirom da pitanje nije ni upućeno njemu, ali pozivam Vas, kao i sve članove obje komisije, mi ćemo razmatrati i zaključke ove Komisije i izjašnjavati se o njima da uputite ova pitanja pismenim putem. Ja ću iskoristiti ovu priliku kao neko ko predsjedava današnjom sjednicom, kako ste se pozvali na zvanične dokumente, da Vas uputim na javno dostupan dokument koji se zove, je li, Rješenje Ureda za razmatranje žalbi BiH od 22.11.2024. možda tu nađete nešto od odgovora na pitanja koja ste postavili, ali sasvim sigurno Vi ćete i kroz djelovanje Vaše Komisije neovisno o ovoj Komisiji baviti se daljnjim, uslovno rečeno, ako treba i istražnim radnjama ukoliko je to u nadležnosti Vaše Komisije.

ZLATAN BEGIĆ

Zahvaljujem.

SABINA ĆUDIĆ

Ja ću za kraj, s obzirom da od

ELMEDIN KONAKOVIĆ

/nije uključen mikrofoni/

... ipak mi je bilo pitanje postavljeno, gospodin Begić je rekao ministru i ostalim.

SABINA ĆUDIĆ

Ukoliko Vi imate potrebu

ELMEDIN KONAKOVIĆ

Imam potrebu

SABINA ĆUDIĆ

da odgovarate o falsificiranju dokumenata.

ELMEDIN KONAKOVIĆ

Ja imam potrebu da se ponovo zahvalim članovima Komisije za borbu protiv korupcije i da im kažem, ja sam spreman gospodine Begiću sa Vama, sa vašim članovima supotpisati ovu krivičnu prijavu, ovo je suština problema, da se ustanovi da li je, ko je falsifikovao, namjestio, uredio, dodijelio, ako je to neko blizak meni, ja molim za maksimalnu kaznu tim osobama. Dakle, u tome se ogleda suština javnih saslušanja, hvala vam, vrlo korektno i ako se to ne otkrije imaćete novi poziv, novi samit, novu odluku, novog bliskog srodnika nekog političara, ako se otkrije neće više nikad.

Hvala.

SABINA ĆUDIĆ

Hvala.

Dajem završnu riječ što se tiče diskusija, ali u trajanju od dvije minute iz privilegije predlagача, odnosno podnosioca ove inicijative, samo gospodinu Keši s obzirom da bismo onda u drugom slučaju morali otvarati čitav drugi krug diskusija, kao privilegija, kažem, predlagача izvolite ukoliko imate potrebu da nešto kažete za kraja ili smatrate da je došlo do nekog neistinitog navoda.

SAFET KEŠO

Hvala lijepa predsjedavajuća.

Ja ću pokušati samo da kratko napravim jedan spisak dodirnih tačaka o kojima je gospodin Konaković govorio kako ih uopće nije imao.

Prva dodirna tačka je nadležnost Ministarstva vanjskih poslova eksplicitno je navedena i glasi – pripremanje i organizacija, znači gore stoji nadležnosti Ministarstva vanjskih poslova, na službenoj web stranici, znači tamo gdje stoji i slika gotovo u prirodnoj veličini gospodina Konakovića, pripremanje i organiziranje međunarodnih posjeta i susreta itd. Idemo dalje.

SABINA ĆUDIĆ

Kolega Kešo, ja ću Vas prekinuti samo zato što ste to već naveli, mislila sam da je došlo do neke povrede ili ste imali potrebu ispraviti neki krivi navod, ponavljam kao privilegija predlagача, ovo ste već izložili identičnim riječima. Ja Vas samo pozivam da ne otvaramo novi krug diskusije.

SAFET KEŠO

A, ne, ne, oprostite, ne otvaramo novi krug, ja želim samo da kažem zapravo gdje su te dodirne tačke, dakle nadležnost. Drugo, i Vi ste govorili o tome, dva člana Tima. Treće, sastanci na kojima je imao svoje predstavnike i obavezu njihovu da mu referišu o tome šta se događa. Četrto, tender na kojem je učestvovala, dakle, kćerka njegovog kuma. Peto, peta dodirna tačka je prazan prostor koji je Konaković bježeći od svoje obaveze ostavio da bi neko mogao

ELMEDIN KONAKOVIĆ

Molim Vas, predsjedavajuća zaštitite dignitet ministra vanjskih poslova, da mi neko kaže bježeći, napadate instituciju, nemojte to raditi, meni nećete to raditi.

SABINA ĆUDIĆ

Kolega, kolega, ministre Konakoviću

SAFET KEŠO

Bježeći od svoje propisane obaveze gospodine Konakoviću ...

SABINA ĆUDIĆ

Kolega Kešo, sve što ste naveli je već u zapisniku sa ove sjednice, ja Vas pozivam, kako Vas tako i sve druge članove

SAFET KEŠO

Ne razumijem predsjedavajuća.

SABINA ĆUDIĆ

ove Komisije da ukoliko imate, dakle, materijal na osnovu kog tražite određene zaključke, Vi znate, ja ću Vas napomenuti, da će zapisnik, izvještaj zajedno sa eventualnim zaključcima sa ove sjednice biti dostavljeno Parlamentarnoj skupštini, odnosno Predstavničkom domu Parlamentarne skupštine BiH gdje ćete još jednom imati privilegiju da nam iznesete sve to, Vi nama sada sumirate, a ne negirate neke krive navode. Ja Vas pozivam, dakle, ovdje ne završava ova diskusija, mi smo članovi ove Komisije, Vi ćete imati priliku isto kao i ja što ću uložiti svoje zaključke imaćete i Vi i o njima ćemo se izjašnjavati. To što izlažete nisu dodatni nalazi već je sumiranje i nema potrebe. Dakle, ja imam tu privilegiju, a evo neću je ni ja koristiti, tako da Vas pozivam.

Prije svega, da se zahvalim kolegama iz dakle komisije koja je naš današnji gost, to je Komisije za sprječavanje, je li, za borbu protiv korupcije, da se zahvalim svim članovima, da se zahvalim Vama kao jednom od inicijatora nečega što mislim da je od izuzetne važnosti za BiH, a to je parlamentarni nadzor, da obavijestim i medije da će zaključci podneseni kako usmeno, tako pismeno biti razmatrani već na narednoj sjednici, a sam izvještaj ide, ponavljam, na Parlament gdje ćete kolega Kešo imati još jednom priliku da nas informišete o svim Vašim mišljenjima.

Ja ću još jednom napomenuti, konstatovati, jer želim da uđe, dva puta na samom početku sjednice i na kraju, nezadovoljstvo i nepoštivanje ove Komisije od strane predsjedavajuće, razumijem poslovne obaveze, sasvim sigurno bismo se prilagodili novim datumom da smo znali da je van BiH i ne adekvatno dostavljenim, odnosno van vremenskog okvira predviđenim Zakonom o parlamentarnom nadzoru dostavljenim pismenim izjašnjenjem i najavom da neće prisustvovati.

Koristim ovu priliku da se zahvalim ministru vanjskih poslova Elmedinu Konakoviću što se odazvao, odgovorio na pitanja i sva pitanja koja butu u pisanom obliku sasvim sigurno ćete ih dobiti kao član Vijeća ministara.

(?)

Dozvoljavate li završno obraćanje kao nekoga ko je bio protiv ovog javnog saslušanja.

SABINA ĆUDIĆ

Žao mi je, zaključili smo diskusiju, nismo dali ni inicijatorima, mislim da smo vrlo adekvatno vodili ovu sjednicu, odnosno dobili postavljena pitanja i odgovore i naravno imaćete priliku da se po tom pitanju oglasite na narednoj sjednici.

Zahvaljujem se medijima na strpljenju i naravno kolegama, svim kolegama i stručnim službama.

Hvala.